

萬 有 文 庫

第一集一千種

王 雲 五 主 編

閱 藏 知 津

(四)

釋 智 旭 編

商 務 印 書 館 發 行

津 知 藏 閣

(四)

編 旭 智 釋

書 叢 本 基 學 國

閱藏知津

卷第十九

大乘經藏 般若部第三之四

菩薩住品第四十八。善現白佛。菩薩欲得菩提。當於何住。應云何住。佛言。當於一切有情。住平等心。起平等心。以平等心與語。起大慈心。大悲心。大喜心。大捨心。恭敬心。質直心。調柔心。利益心。安樂心。無礙心。如父母兄弟姊妹男女親族心。朋友心。如親教師軌範師弟子同學心。如預流一來不還阿羅漢心。如獨覺心。如菩薩心。如如來心。應供養恭敬尊重讚歎心。應救濟憐愍。覆護心。畢竟空無所有不可得。心。空無相無願心。當於此住。復次應自離十惡。勸他離十惡。恆正稱揚離十惡法。歡喜讚歎離十惡者。應自修一切善。勸他修一切善。稱揚一切善法。讚歎修一切善者。應如是住。若如是學。如是安住。則於色等得無障礙。所以者何。從前際來。不攝受色等。何以故。色等不可攝受故。若色等不可攝受。則非色等。說是品時。萬二千菩薩得無生法忍。不退轉品第四十九。善現白佛。不退轉菩薩。有何行。有何狀。有何相。我等云何知。佛言。菩薩如實知異生地。二乘地。菩薩地。佛地。於諸法真如中。無變異。無分別。皆無二無二分。雖如實悟入諸法真如。而於諸法真如無所分別。以無所得爲方便故。聞真如與一切法無二無別。而無疑滯。以真如與一切法。不可說一異俱不俱故。是菩薩若無義利。終不發言。不觀視他。

好惡長短平等憐愍。而爲說法。善現復白佛。以何行狀相。知是不退轉菩薩。佛言。能觀一切法無行狀相。是爲不退轉菩薩。謂於色等退轉。故名不退轉。以色等自性無所有。菩薩於中不住。故名退轉。若不退轉菩薩。終不樂觀外道。於毗柰耶終無疑惑。無戒禁取。不生三惡趣等。受行十善。恆修六度。通利十二分教。持法施善根。與諸有情迴向菩提。於深法門。不生疑惑猶豫。都不見有色等。可於中生疑惑猶豫。成就柔潤三業。於諸有情。心無罣礙。決定不與五蓋共居。恆住正念。正知身心清淨。不貪四事。雖受十二杜多功德。而無所恃。惡魔化現。不信不隨。決定不退一切善法。於色等想退轉。以自相空觀一切法。已入菩薩正性離生。乃至不見少法。可得無所造作。畢竟不生。故名無生法忍。得是忍故。名不退轉。又答善現。是菩薩不復退墮二乘地中。故說不退轉。故名不退轉。遠離二乘地。於彼二地。決定退捨。故說以退轉故名不退轉。隨意能入十二門禪三十七品等。而不受其果。常不遠離大菩提心。不貴重色等。雖現攝受五欲。而不染著。不行邪命。復有所餘諸行狀相。通達諸法。皆無所有。常不遠離大菩提心。不樂觀察論說色等。但樂觀察論說般若。常不遠離一切智智相應作意。修行施等。離慳貪等。雖住一切法空。而愛樂正法。不樂非法。雖住不可得空。而常稱讚不壞法性。饒益有情。雖住眞如法界。而愛善友。不樂惡友。常樂見佛聞法。常不遠離念佛聞法作意。生生之處。常不離佛。恆聞正法。護持正法。不惜身命。巧方便品第五十。佛告善現。不退菩薩。成就廣大無量無邊。不可數難思議勝功德聚。住不共二乘智。引發四無礙解。又色等亦名甚深。色等眞如甚深故。色等眞如非即色等。非離色等故。善現白佛。甚奇微妙方便。爲不退菩薩遮遣色等。顯示涅槃。佛印述云。菩薩應於如是諸甚深處。依深般若相。

應理趣。審諦思惟。稱量觀察。應作是念。我今應如所說而住。應如所說而學。則能攝取無數功德。超無量劫生死流轉。疾證菩提。若此功德有形量者。恆沙世界不能容受。次以遠離般若所修得福。與依深般若所獲功德。重重較勝。善現白佛。分別所作。皆非實有。何緣是諸菩薩獲福無邊。佛言。菩薩行深般若。知一切種分別所作。空無所有。虛妄不實。善學二十空。如如觀察。即不遠離甚深般若。獲福無數。無量無邊。不可數在。有爲無爲界中。不可量在。去來現在法中。不可測度。彼邊際故。復次色等亦無數無量無邊。色等空故。善現白佛。一切法空。即是無盡。亦是無數無量無邊。佛言。如是善現復問。若不可說義無增無減。則布施等亦無增無減。云何菩薩修行施等。證得無上菩提。佛言。如是菩薩不作是念。我於般若等若增若減。但作是念。惟有名想。謂爲般若等。是菩薩修施等時。持此施等俱行作意。及依此起心及善根。與諸有情平等共有。迴向善提。如佛菩提微妙甚深而起迴向。由此迴向巧方便力。證得無上菩提。善現白佛。何謂無上菩提。佛言。諸法真如是。又問。何謂諸法真如。佛言。色等真如是。諸法真如無增無減故。無上菩提亦無增無減。菩薩不離般若。常樂安住諸法真如。都不見法有增有減。由此不可說義無增無減。施等乃至一切相智。亦無增無減。菩薩依止無增無減。方便修行般若。由此爲門。集諸功德。便證無上菩提。善現白佛。用初心證。用後心證。佛言。如然燈時。爲初能燒。爲後能燒。炷。善現言。非初能亦不離初能。非後能亦不離後能。其炷實燋。佛言。菩薩亦爾。善現言。菩薩不作是念。我當壞相。及壞相想。亦不作是念。我當壞無相。及壞無相想。於一切種無分別故。是菩薩雖能離諸分別。而佛十力等未圓滿故。未證無上菩提。由此善巧方便力。故於一切法不取不壞。知一切法自相空。

故住一切法自相空中。爲度有情。入三三摩地。大悲願力所牽逼。用此三定成熟有情。佛言。如是。舍利子。問菩薩夢中入三三摩地。於深般若若有增益。不善現答言。晝時入三三摩地。於深般若若有增益者。彼夢中入亦有增益。晝與夢中無差別。故乃至令與慈氏問答。願行品第五十一。佛告善現。菩薩修行施等。見有情苦。作願勤修。速得圓滿。隣近菩提。又見有情三聚無別墮三惡趣等。皆悉作願勤修。六度令速圓滿。殞伽天等第五十二。授天女菩提記。善學品第五十三。善現白佛。行深般若菩薩。云何修習。近空三摩地等。云何入空三摩地等。佛言。應觀色等空。不令心亂。若心不亂。則不見法。若不見法。則不作證。善學諸法。自相皆空。無法可增。無法可減。故於諸法不見不證。以勝義諦中能證。所證處。證時。及由此證。若合若離。皆不可得。不可見。故菩薩觀法空時。先作是念。我爲學故。觀不爲證。故觀。今是學時。非爲證時。是菩薩未入定位。繫心於所緣。已入定時。不繫心於境。不退六度二十空等。不證漏盡。如堅翅鳥。飛騰虛空。自在翱翔。久不墮地。雖依空戲。而不住空。亦不爲空之所拘礙。又如善射。箭箭相承。不令墮落。次廣明不退轉相。及廣明魔惱亂相。又廣明傲慢餘菩薩罪。申明菩薩真遠離行。并示菩薩真勝善友。勸諸菩薩當學般若。於此經中廣說菩薩所應修學一切法相。善現白佛。般若以何爲相。佛言。以虛空爲相。無相爲相。諸法諸相。皆不可得。無所有。故又有因緣。故可說般若所有妙相。諸法亦有如是妙相。所以者何。般若以性空爲相。諸法亦以性空爲相。般若以遠離爲相。諸法亦以遠離爲相。以一切法皆自性空。離衆相。故善現白佛。則一切法。一切法空。亦一切法。一切法離。云何有情可施設有雜染清淨。佛言。有情長夜有我。我所心執。我所不答。言如是。佛言。彼心所執。我及我所空。遠

離不。答言如是。佛言。豈不有情。由我我所執。流轉生死。答言如是。佛言。如有情流轉生死。由有雜染。以是證知。雜染可得。若諸有情。無心執著我及我所。則無雜染。若無雜染。是則應無流轉生死。流轉生死。既現可得。應知有雜染法。既有雜染。亦有清淨。是故應知有情。雖自性空。遠離衆相。而有雜染。清淨可得。善現白佛。菩薩若如是行。則不行色等。佛言如是。乃復廣較宣說般若相應作意功德。當知已到。福田彼岸。一切有情無能及者。雖於有情平等發起大慈悲等。而於一切無所執著。斷分別品第五十四。善現白佛。一切作意。皆自性離自性空。諸法亦爾。云何菩薩不離般若。若相應作意。不離一切智智。相應作意。佛言如是。離空非二乘菩薩。佛作亦非餘作。然一切法。法住法定等法。爾常住。是菩薩不離般若。若相應作意。亦不離一切智智。相應作意。何以故。甚深般若。若一切智智。及諸作意。皆自性離自性空。故如是離空。無增無減。能正通達。名不離故。善現復問。云何修證般若平等性。已證得無上菩提。佛言。非諸佛法有增有減。亦非一切法。住法定等有增有減。以甚深般若。非一非二。非三非四。亦非多故。善現復問。爲即深般若。空虛非有。不自在性。不堅實性。能行般若。若不爲離深般若。空虛非有。不自在性。不堅實性。有法可得。能行般若。若不爲即深般若。能行般若。若不爲離深般若。能行般若。若不爲即空性能行空。不爲離空性能行空。不爲即色等能行般若。若不爲離色等能行般若。不佛一一答言。不也。色等空虛。非有。不自在性。不堅實性。若即若離。廣作問答。亦如是。色等真如。乃至不思議界。若即若離。廣作問答。亦如是。善現白佛。若如是諸法。皆不能行般若。云何菩薩能行般若。佛言。汝見有法。能行般若。若不。汝見般若。是菩薩所行處。不汝所不見法。是法可得。不可得法。有生滅。不善現一一答言。不也。佛言。如汝所

見諸法實性。即是菩薩無生法忍。成就是忍。便爲如來授菩提記。善現復問。菩薩以一切法無生性得記。不以一切法生性得記。不以一切法生無生性得記。不以一切法非生非無生性得記。佛皆答言。不也。善現白佛。云何菩薩得不退記。佛言。汝見有法得佛記不。善現答言。不也。佛言。如是菩薩於一切法無所得時。不作是念。我於菩提當能證得。我用是法證得菩提。我由此法。於如是時。如是處證得菩提。所以者何。無分別故。巧便學品第五十五。帝釋白佛。若於般若聽受修行。正爲他說。乃至菩提。不難諸餘心心所者。當知必不成就。微少善根。佛印述較勝已。帝釋爲一苾芻。復廣較勝。兼爲阿難明是佛威神力。佛言。般若功德。非人天等所能知。故次爲阿難分別有擾亂不擾亂相。及明出罪還補善法。或無或有差別。深囑菩薩於有情類。不應發起瞋忿等心。亦不應生麤惡言說。次答阿難菩薩與菩薩共住之間。善現白佛。云何菩薩平等性。而諸菩薩於中學故名平等學。佛言。內空等是平等性。復次色等。色等自性空。是平等性。菩薩於中學故名平等學。善現復問。爲色等盡故學。離故學。滅故學。無生故學。無滅故學。本來寂靜故學。自性涅槃故學。是學一切智智不。如是廣問竟。佛言。如汝所說。於意云何。色等真如盡滅。斷不答言。不也。佛言。若菩薩於真如如是學。是學一切智智。當知真如無盡。無滅。無斷。不可作證。一一述答亦爾。復次如是學時。是學施等。乃至是學無上菩提。若學施等。是學一切智智。至一切學圓滿彼岸。善現白佛。若一切法本性清淨。云何菩薩於諸法中復得清淨。佛言。如是諸法。本來自性清淨。菩薩於中精勤修學。甚深般若。如實通達。無沒無滯。遠離一切煩惱染著。故說菩薩復得清淨。復次雖一切法本性清淨。而諸異生不知見覺。菩薩欲令彼知見覺。修行布施等。安住內空等。如是

學時。於佛十力等無量佛法。皆得清淨。不墮二地。於諸有情心行差別。皆能通達至極彼岸。善巧方便。令諸有情證一切法本性清淨。如是修學。終不發起慳貪破戒等心。終不發起執取色相等相應之心。何以故。都不見法是可得者。無所得故。不起執取色等法相相應之心。修學如是般若。無有一切功德善根而不能得。願喻品第五十六。帝釋心念歎勝。佛讚印之。散華發願。問隨喜福。佛答不可數知。善現白佛云。何菩薩以如幻心能證無上菩提。佛言。汝見如幻心不答言不也。佛言。若處無幻。無如幻心。汝見有是心能證菩提不。答言不也。佛言。若處離幻。離如幻心。汝見有是法能證菩提不。答言不也。我都不見即離心法。說何等法。是有是無。以一切法畢竟離故。若法畢竟離。是法不應修。亦不應壞。亦不應引。般若畢竟離故。不應能引。云何離法能證離法。佛言。善哉。以般若等畢竟離故。菩薩可得無上菩提。若般若等非畢竟離。應非般若等。以般若等畢竟離故。名為般若等。是故菩薩非不依般若。能證無上菩提。雖非離法能證離法。而證菩提。非不依止甚深般若。是故菩薩欲得菩提。應學般若。善現白佛。菩薩所行法義。極為甚深。佛言。如是。菩薩能為難事。行甚深義。而不作證。善現白言。菩薩所作不難。所以者何。所證法義。能證般若。證法證者。證處證時。都不可得。譬如虛空。幻士影像。如來變化。機關於一切法。無分別故。舍利子問。但般若無分別耶。善現答言。靜慮等亦無分別。舍利子問。色等亦無分別耶。善現印答。舍利子問。若一切法皆無分別。云何有五趣差別。云何復有三乘位異。善現言。有情顛倒煩惱因緣。造種種業。感異熟果。依此施設五趣差別。無分別故。有修預流及預流果等三乘聖位。去來現在如來。由無分別。分別斷故。可施設有。由此因緣。知一切法皆無分別。以無分別真如法界法性實際。

爲定量故。菩薩應行如是無分別相般若。便能證得無分別相所求菩提。堅等讚品第五十七。舍利子問。菩薩行深般若。爲行堅實法。無堅實法耶。善現答言。行無堅實法。般若等無堅實故。尙不見無堅實可得。况見有堅實可得。諸天作念。若人發心如深般若。義行不墮二地。甚爲希有。應當敬禮。善現告言。是未希有。若菩薩知一切法及諸有情。皆不可得。而發心擐功德鎧。度令究竟涅槃。乃甚希有。如調伏虛空。如與虛空戰。何以故。色等離。故有情離。復次色等離。故施等離。若菩薩聞說諸法無不遠離。心不沈沒。驚怖憂悔。是爲行深般若。佛言。何因緣故。菩薩於深般若。心不沈沒。善現言。以一切法。皆非有故。皆遠離故。皆寂靜故。無所有故。無生滅故。觀一切法。皆不可得。不可施設。是能沈沒。是所沈沒。是沈沒時。是沈沒處。是沈沒者。由此沈沒。若能如是行深般若。釋梵禮敬。佛言。非但釋梵。亦爲淨居諸天禮敬。亦爲十方佛所護念。則令一切功德圓滿。一切惡魔不能沮壞。以成就二法故。一觀諸法皆畢竟空。二不棄捨一切有情。又一如所言。皆悉能作。二爲諸佛常所護念。若菩薩聞說般若。心無疑惑。深生淨信。當於不動佛所。及諸菩薩所。廣聞其義。信解不退。證得一切智智。善現白佛。諸法實性。皆不可得。云何安住真如。精勤修學。疾證菩提。佛言。如佛所化。安住真如。修菩薩行。疾證菩提。宣說正法。菩薩亦復如是。帝釋白佛。般若極難信解。菩薩甚爲難事。觀一切法。都無所有。於深法性。無疑無滯。善現語言。菩薩觀一切法。無不皆空。都無所有。誰沈誰沒。誰怖誰驚。誰疑誰滯。未爲希有。帝釋白言。如箭射空。近遠無礙。尊者所說。亦復如是。囑累品第五十八。帝釋白佛。讚善現所說。無不依空等。佛告帝釋。善現安住空故。觀施等。尙不可得。况有行施等者。善現於一切法。住遠離住。寂靜住。無所得住。空住。無相住。無

願住。如是等無量勝住。比菩薩所住般若最勝行住。乃至鄔波尼殺曇分。所不及一。於是諸天散華。六千苾芻得菩提記。同名散華如來。佛語慶喜。雖種三乘善根。要於甚深般若。修行六度。安住二十空等。令得圓滿。是故我以般若付囑於汝。忘失餘法。其罪猶小。忘失般若。其罪甚大。乃至種種讚說付囑。令受持已。復現神力。令衆皆見不動。如來海會說法。彼土莊嚴。佛攝神力。衆忽不見。佛告慶喜。如彼佛土。非此土眼所行境界。一切法亦如是。皆非眼根之所行境。法不行法。法不見法。法不知法。一切法無行者。無見者。無知者。無動無作。能取所取。性遠離故。能所思議。性遠離故。如幻事等。衆緣和合。相似有故。無作受者。妄現似有。無堅實故。若如是知如是見如是行者。是行般若。亦不執著此諸法相。如是學時。於諸學中。爲最爲勝。爲長爲尊。爲妙爲微妙。爲上爲無上。諸有欲取般若。量邊際者。如愚欲取虛空。量及邊際。慶喜白佛。何故般若無量。佛言。性無盡故。性遠離故。性寂靜故。無實際故。如虛空故。三世諸佛皆學般若。證得菩提。宣說開示。而此般若亦無有盡。已不盡。今不盡。當不盡。靜慮等一一皆爾。內空等一一皆爾。所以者何。此等諸法。無生無滅。亦無住異。云何可得施設有盡。佛復出廣長舌。明無虛妄。若能受持般若。陀羅尼者。則爲總持一切佛法。無盡品第五十九。善現問佛。般若爲無盡不。佛言。實爲無盡。猶如虛空。不可盡故。復問。云何應引般若。佛言。色等無盡故。應引般若。復次。色等虛空。無盡故。應引般若。復次。觀無明等。如虛空。無盡故。應引般若。如此觀察十二緣起。遠離二邊。是諸菩薩不共妙觀。不見有法無因而生。不見有法無因而滅。不見有法常住不滅。不見有法有我。有情等。不見有法若常若無常。若樂若苦。若我若無我。若淨若不淨。若寂靜若不寂靜。若遠離若不遠離。是菩薩雖行般若等。

而不見有所行。亦不見有法能見所行。以無所得而爲方便。修行如是般若。一切魔大愁惱。次答善現。菩薩能正修行般若。便能具足修滿六波羅密。相引攝品第六十。善現白佛。云何安住布施。引攝淨戒等五。乃至安住般若。引攝布施等五。佛廣答之。多問不二品第六十一。善現白佛。如是菩薩發心幾時。乃至植幾善根。佛言。發心甚久。善根無不圓滿。如是般若。如日月輪。照餘五度。如有七寶。乃名輪王。如強夫守護美女。如軍將善備鎧杖。如小王朝侍輪王。如水隨恆河入海。如右手能作衆事。如大海同一鹹味。如聖王輪。最居先導而無分別。何以故。波羅密多。及一切法。自性皆鈍。無所能爲。虛妄不實。空無所有。不自在。譬如陽燄。光影。水月。鏡中像等。其中都無分別作用。真實自體。善現白佛。若一切法。自性皆空。云何菩薩勤修六度。當得菩提。佛言。菩薩恆作是念。有情心皆顛倒。沒生死苦。我若不修。善巧方便。不能解脫彼苦。作是念已。捨內外物。捨已。復作思惟。我於此物。都無所捨。此內外物。自性皆空。非關於我。不可捨故。又復爲諸有情。終不犯戒。不起瞋恨。常無懈怠。不起亂心。修學勝慧。由此觀察。修行六度。速得圓滿。疾證菩提。善現白佛。若六度無差別相。皆是般若。若所攝受故。皆由般若。修成滿故。應合成一波羅密多。云何可說般若於布施等。爲最爲勝。及無上等。佛言。如諸有情。種種相別。若近妙高山王。咸同一色。善現復問。波羅密多。及一切法。若隨實義。皆無此彼勝劣差別。何緣故說般若最勝。佛言。但依世俗言說作用。說有此彼勝劣差別。施設六度。度脫有情世俗作用。生老病死。然諸有情。生老病死。皆非實有。但假施設。所以者何。有情無故。當知諸法。亦無所有。甚深般若。了達一切。都無所有。能拔有情世俗作用。生老病死。由此故說般若最勝。善現白佛。般若於諸善法。有取捨不。佛言。無取無

捨。以一切法。皆不可取。不可捨。故。謂於色等。無取無捨。善現復問。般若云。何於色等。無取無捨。佛言。般若。若。不思惟色等。如是於色等。無取無捨。善現復問。般若云。何不思惟色等。佛言。般若。若於色等。不思惟一切相。亦不思惟一切所緣。如是不思惟色等。善現復問。若菩薩。不思惟色等。云何增長所種善根。云何圓滿波羅密多。云何能得一切智智。佛言。若時菩薩。不思惟色等。是時便能增長所種善根。便能圓滿波羅密多。便能證得一切智智。所以者何。要。不思惟色等。乃能具足修菩薩行。證得無上菩提。善現復問。何緣。要。不思惟色等。乃能具足修菩薩行。證得菩提。佛言。若思惟色等。則染著欲界色。無色界。不能具足修菩薩行。證得菩提。若。不思惟色等。則不染著三界。則能具足修行。證得菩提。善現復問。菩薩勤學般若。當於何住。佛言。不應住色。乃至不應住諸佛無上菩提。又問。何緣。不應住色等。佛言。於一切法。無執著。故。不應住色等。是菩薩。不見有法。可於其中而起執著。及安住。故。如是以無執著。及無安住。而爲方便。行深般若。波羅密多。復次。若作是念。能如是。無所執著。安住行深般若。是行般若。能如是。無所執著。安住行深般若。是修般若。我應如是。行。如是修。由如是念。取相執著。遠離般若。亦遠離靜慮等。乃至遠離無上菩提。何以故。甚深般若。於一切法。無所執著。非深般若。有執著性。所以者何。甚深般若。都無自性。可於諸法。有所執著。是故菩薩。修行般若。於一切法。及深般若。皆無執著。復次。若起是想。此是般若。我行般若。則是徧行諸法實相。菩薩。由起此想。便退般若。亦退靜慮等。何以故。般若。是一切種白法根本。若退般若。則爲退失一切白法。復次。若作是念。般若。徧能攝受六度二十空等。則退失般若。亦不能攝受六度二十空等。何以故。非離般若。能徧攝受殊勝善法。及證菩提。復次。若作是念。安住般若。

便於菩提定得受記。則爲退失般若。不得受記。復次若作是念。安住般若。則徧引發布施等。亦徧安住內空等。則退失般若。不能引發布施等。不能安住內空等。復次若作是念。佛知諸法無攝受相。自證菩提。得菩提已。爲諸有情宣示諸法實相。則爲退失般若。何以故。如來於法無知無覺。無說無示。以諸法實相不可知覺。不可施設。云何得有知覺說示一切法者。若言實有知覺說示一切法者。無有是處。善現白佛。云何遠離種種過失。佛言。若作是念。諸法無所有。不可取。無有能現等覺者。亦無有能宣說開示。若如是行。是行般若。離諸過失。若著無所有。不可取法。則離般若。何以故。甚深般若於一切法無所執著。無所攝受。善現白佛。般若於般若。爲遠離爲不遠離。乃至三智於三智。爲遠離爲不遠離。若般若於般若等。設遠離設不遠離。云何能無執著引發般若等。內空等。則云安住。佛言。非遠離非不遠離。是故能無執著。引發安住。何以故。非即自性。非離自性。而能安住。引發自性。復次菩薩行深般若時。不執著色等。謂此是色等。此色等屬彼。於如是一切法無執著故。便能引發般若等。安住內空等。若於諸法中有所執著。謂此是法。此法屬彼。則不能隨意引發安住殊勝功德。復次菩薩行深般若時。不觀色等。若常若無常。乃至若遠離若不遠離。便能引發安住殊勝功德。復次若行深般若。則爲行靜慮。乃至行一切相智。復次甚深般若。隨所行處。餘善皆從。隨所至處。餘善皆至。如四軍隨輪王。又般若如善御者。御餘善法。行於正道。至一切智智。善現白佛。云何爲道。云何非道。佛言。諸異生道。聲聞道。獨覺道。非菩薩道。自利他道。一切智智道。不住生死及涅槃道。是菩薩道。甚深般若。能爲大事。示現道非道相。令菩薩知。速證一切智智。復次能爲大事。度諸有情。皆獲利益安樂。雖作無邊利樂他事。而於此事無所

取著。雖能示現色等所作事。而無取著。引導菩薩。令趣菩提。定不退轉。而於諸法。無起無滅。以法住性。爲定量故。善現白佛。若深般若。於一切法。無起無滅。云何菩薩。應修六度。佛言。菩薩應緣一切智智。爲諸有情。而修施等。持此善根。與諸有情平等。共有迴向菩提。於迴向時。遠離三心。謂誰迴向。用何迴向。迴向何處。是菩薩持此善根。如是迴向菩提。則修六度四等。速得圓滿。疾得一切智智。善現白佛。云何能與六度。常共相應。不相捨離。佛言。如實觀色等非相應。非不相應。是能與六度。常共相應。不相捨離。復次。恆作是念。我不應住色等。以色等非能住。非所住故。是能與六度。相應不離。善現白佛。菩薩應於般若。常勤學耶。佛言。如是。般若如大海。是諸善法。生長方便。所趣向門。三乘皆當勤學。菩薩於般若。勤修學時。應勤修學布施等。應勤安住內空等。如善射人。甲冑堅固。執好弓箭。不懼怨敵。菩薩亦如是。攝受般若。及靜慮等諸功德時。皆以般若。而爲方便。一切魔外。皆不能伏。便爲三世諸佛。護念。以能行布施。乃至能行一切相智故。善現復問。云何行布施等。便爲諸佛。護念。佛言。行施等時。觀施等。不可得故。爲佛護念。復次。三世諸佛。如色等。不可得故。護念是菩薩。復次。三世諸佛。不以色等故。護念是菩薩。善現白佛。菩薩雖多處學。而無所學。佛言。如是。實無有法。可令菩薩。於中學故。善現復言。佛爲菩薩。或略或廣。宣說六度相應之法。若欲證菩提。皆應聽受。讀誦通利。如理思惟。審正觀察。心心所法。於所緣相。皆不復轉。佛言。如是。又問。云何於一切法。如實了知。略廣之相。佛言。若如實了知色等。真如相。是於一切法。知略廣相。又問。云何色等。真如相。菩薩如實了知。而於中學。於一切法。知略廣相。佛言。色等。真如無生無滅。亦無住異。而可施設。菩薩如實了知。當於中學。於一切法。如實了知。略廣之相。乃至無上善。

提。一一問答亦爾。復次如實了知色等實際相。是於一切法如實了知略廣之相。善現白佛。云何色實際相。佛言。無色際是名色實際相。乃至無上菩提。一一問答亦爾。復次如實了知色等法界相。是於一切法如實了知略廣之相。善現白佛。云何色法界相。佛言。色界虛空界是名色法界。此色法界無斷無別而可施設。是名色法界相。乃至無上菩提。一一問答亦爾。善現又問。復云何應知一切法略廣相。佛言。如實了知一切法不合不散。當知一切法略廣相。謂色等皆不合不散。何以故。如是諸法皆無自性。則無所有。則不可說有合有散。於一切法如是了知。則能了知略廣之相。善現白佛。如是名為略攝六度。若於中學。能多所作。初修業。乃至十住地。皆應於中學。學此略攝波羅密多。於一切法知廣略相。佛言。如是如是法門。利根能入。中根亦能入。定根能入。不定根亦能入。若專於中學。無不能入。非懈怠等之所能入。若如所說而學。能隨證得六度二十空等。福聚甚多。善知所緣門。善知行相門。善知字門。善知非字門。善知言。不言。一增語。二增語。乃至善知界。善知非界。又善知色等作意。又善知色等色等相。又善知止息道。不止息道。生滅住異。乃至善知安立三乘方便。善現白佛。菩薩云何當行般若。當引般若。當修般若。佛言。觀色等乃至老死寂靜故。可破故。不自在故。體虛妄故。不堅實故。應行般若。又如引虛空。應引般若。如修虛空。應修般若。又問。為經幾時當行。當引。當修。佛言。從初發心。乃至坐菩提座。應行。應引。應修。又問。住何等心。無間當行。引修。佛言。從初發心。乃至菩提。不容發起諸餘作意。唯常安住。一切智智相應作意。應行。引修。般若。如是行。引修。般若。乃至能令心心所法。於境不轉。又問。菩薩行。引修。般若。當得一切智智。不行。不引。不修。般若。當得一切智智。不行。亦不行。般若等。當得一切智

智不。非行非不行般若等。當得一切智智不。佛一一答言不也。又問。若爾。菩薩云何當得一切智智。佛言。如真如。云何真如。如實際。云何實際。如法界。云何法界。如我界。乃至補特伽羅界。云何如我界等。佛言。若我若有情等。爲可得。不善現言不也。佛言。若我等不可得。云何可施設我界等。若菩薩不施設般若。亦不施設一切智智。及一切法。定得一切智智。善現。又問。爲但般若不可施設。爲靜慮等亦不可施設耶。佛言。一切法皆不可施設。又問。云何可施設。是地獄。是傍生。乃至是諸佛。是一切法耶。佛言。有情施設。及法施設。實可得。不善現言不也。佛言。菩薩行般若時。應學一切法。皆不可施設。善現。又問。豈不應於色等學。佛言。應於色等學。不增不減。又問。云何應於色等學。不增不減。佛言。應於色等不生不滅。故學。又問。云何應於色等不生不滅。故學。佛言。應於色等不起作諸行。若有若無故學。又問。云何應於色等不起作諸行。若有若無故學。佛言。應觀諸法自相皆空。故學。如是應於色等不起作諸行。若有若無故學。又問。云何應觀諸法自相皆空。故學。佛言。應觀色等色等相空。故學。又問。若色等色等相空。云何菩薩當行般若。佛言。由此般若不可得。菩薩不可得。行亦不可得。若能行者。若由此行。若所行處。皆不可得。是故都無所行。是行般若。以於其中一切戲論不可得。故。又問。初修業菩薩。云何當行。佛言。從初發心。應於一切法常學無所得。修施等時。以無所得而爲方便。應修施等。住內空等時。以無所得而爲方便。應住內空等。又問。云何名有所得。云何名無所得。佛言。諸有二者。名有所得。諸無二者。名無所得。諸眼諸色爲二。乃至諸菩提諸佛爲二。如是一切有戲論者。皆名有二。非眼非色爲無二。乃至非菩提非諸佛爲無二。如是一切離戲論者。皆名無二。又答善現。非由有所得。故無所得。亦非由無所得。故

無所得。然有所得無所得平等性。是名無所得。菩薩於有所得無所得平等性中。應勤修學。如是學時。名學般若無所得義。離諸過失。善現白佛。若不著有所得不著無所得。云何從一地至一地。漸次圓滿。佛言。非住有所得中。能從一地至一地。亦非住無所得中。能從一地至一地。何以故。般若無所得故。菩提無所得故。行者行處。行時無所得故。此無所得法。亦無所得故。應當如是修行般若。又問。若般若等俱不可得。云何菩薩修行般若。若時於一切法常樂決擇。謂此是色等。佛言。雖於諸法常樂決擇。而不得色等。又問。若不得色等。云何能圓滿六度。入正性離生位。嚴淨佛土。成熟有情。得一切智智。轉法輪。作佛事。解脫有情生死衆苦。令證涅槃。佛言。菩薩不爲色等故修行般若。又問。爲何事故修行般若。佛言。無所爲故。以一切法無所爲。無所作。應以無所爲無所作而爲方便。修行般若。又問。若一切法皆無所爲。無所作。不應安立三乘差別。佛言。非無所爲無所作。法安立可得。要有所爲有所作法。安立可得。所以者何。愚夫異生。執著色等。由執著故。念色得色。乃至念菩提得菩提。作如是念。色等實可得。我當決定。証得菩提。脫諸有情生死衆苦。令獲究竟常樂涅槃。是諸愚夫無聞異生。顛倒因緣。作如是念。則爲謗佛。何以故。佛以五眼求色等。尚不可得。若有決定。當得菩提。及脫有情生死。令獲涅槃。無有是處。又問。若諸如來。皆以五眼求色等。不可得。故諸有情類。亦不可得。則定無有証得菩提。及脫有情生死。令獲涅槃。云何世尊。証得菩提。安立有情。三聚差別。佛言。我以五眼。如實觀察。決定無我能証菩提。安立有情。三聚差別。然諸有情。愚癡顛倒。於非實法。起實法想。於非實有情。起實有情想。我爲遣除彼虛妄執。依世俗說。不依勝義。善現復問。爲住勝義。證得菩提耶。爲住顛倒。証得菩提耶。將無世尊。不証菩提。

耶。佛皆言不也。我雖証得菩提。然不住有爲界。亦不住無爲界。如諸如來所變化者。雖不住有爲無爲界。然有去來坐立等事。亦行布施等。亦住內空等。如來亦爾。知一切法皆如變化。說一切法皆如變化。雖有所作。而無真實。雖度有情。而無所度。如所化者。度化有情。如是菩薩修行般若。應如佛所化者。雖有所爲。而無執著。次引過去善寂慧佛。畱化半劫。作諸佛事。應信諸法皆如變化。次明佛身由法性。故作淨福田。化佛亦爾。由法性。故作淨福田。供佛供化。福皆無盡。慈敬憶念。散華稱名。善根亦皆無盡。菩薩應以諸法。法性而爲定量。修行般若。善巧方便。入諸法。法性已。而於諸法。不壞法性。謂不分別。此是般若。此是般若。法性等。善現白佛。云何如來自壞諸法。法性。謂佛常說。此是色等。乃至此是有爲法。此是無爲法。佛言。我不自壞諸法。法性。但以名相方便。假說諸法。法性。令諸有情。得悟諸法。法性。無差別。又問。云何佛於無名無相法。以名相說。令他悟入耶。佛言。我隨世俗。假立名相。方便宣說諸法。法性。而無執著。如諸愚夫。聞說苦等。執著名相。不知假說。佛及弟子。如實知隨世俗說。無有真實。諸法名相。菩薩住一切法。但假名相。應行般若。而於其中。不應住著。善現又問。若一切法。但有名相。菩薩爲何事。故發善提心。勤苦修行。佛言。以一切法。但有名相。但假施設。名相性空。諸有情類。顛倒執著。生死不脫。是故菩薩。發心行行。証得一切相智。以三乘法。度脫令出生死。入涅槃界。而諸名相。無生無滅。亦無住異。施設可得。又問。三智有何差別。佛言。一切智。共二乘。道相智。共菩薩。一切相智。是如來不共妙智。一切智者。謂蘊處界等。二乘亦能了知。而不能知一切道相。及一切法。一切種相。菩薩應學。徧知一切道相。雖令此道。作所應作。而不令其証於實際。知一切法。皆同一相。謂寂滅相。故名一切相智。復次諸行。

狀相。能表諸法。如來如實。能徧覺知。故名一切相智。又問。道與涅槃。俱無自性。佛何故說。此是預流。乃至此是如來。佛言。如是一切。無爲所顯。又問。無爲法中。實有預流。乃至如來。差別義。不。佛言。我依世俗。言說顯示。不依勝義。非勝義中。有語言路。或分別慧。或復二種。然彼彼邊斷。立彼彼後際。又問。既一切法。自相皆空。前際尙無。况有後際。佛言。如是。然諸有情。不解諸法。自相皆空。爲饒益彼。方便爲說。此是前際。此是後際。然一切法。自相空中。前際後際。俱不可得。菩薩達一切法。自相空已。修行般若。無所執著。次達般若。波羅密多名義。次明行般若。甚深義趣。應作是念。我不應行貪等義。非義。我不應行色等義。非義。所以者何。如來得菩提時。不見有法。能與少法爲義。非義。如來出世。若不出世。諸法。法性。法住。法定。法爾常住。無法於法爲義。非義。如是菩薩。應離義。非義。常行般若。甚深義趣。

卷第二十

大乘經藏 般若部第三之五

實說品第六十二。佛答善現。譬如良田種樹。是人雖復不見此樹根莖枝葉華果受者。而種樹已。溉灌守護。漸得生長。衆人受用。愈疾獲安。菩薩亦復如是。雖不見有情佛果。而爲有情。求趣菩提。修六度滿。證得菩提。令諸有情受用佛樹。葉饒益者。脫惡趣苦。華饒益者。生人天中。果饒益者。住三乘果。是諸有情。得成佛已。復用佛樹枝葉華果。饒益有情。雖作如是大饒益事。而都不見真實。有情得涅槃者。唯

見妄想衆苦寂滅。如是菩薩修行般若。不得有情。及彼施設。然爲除彼我執顛倒。求趣菩提。甚爲難事。善現白佛。常知菩薩。即是如來。佛言。如是。若無菩薩。則無三世諸佛。亦無三乘。亦無有能永斷三界。若由此真如施設如來。即由此真如施設獨覺。乃至施設色等及一切法。如是一切法真如。一切有情真如。一切如來真如。一切菩薩真如。實皆無異。故名真如。菩薩於此真如修學圓滿。證得菩提。故名如來。如是菩薩應學真如。甚深般若。若學真如。甚深般若。則能學一切法真如。則能圓滿一切法真如。則於一切法真如得自在住。則能善知有情根性勝劣。則能具知有情勝解差別。則知有情自業受果。則能具足願智。則能淨修三世妙智。則能無倒行菩薩行。則能如實成熟有情。則能如實嚴淨佛土。則能證得一切智智。則能轉妙法輪。則能安立有情於三乘道。則令有情入涅槃界。菩薩見是自利利他一切功德。應發無上覺心。勇猛精修般若。堅固無退。次較福勝。次問初發心菩薩。何所思惟。佛言。恆正思惟一切相智。無性爲性。無性爲所緣。正念爲增上。寂靜爲行相。無相爲相。又問。爲色等亦無性爲性。佛印述之。又問。何緣一切相智無性爲性。色等亦無性爲性。佛言。一切相智自性無故。若法自性無。是法無性爲性。色等亦爾。又問。何緣一切相智自性無。佛言。無和合自性故。若法無和合自性。是法則以無性爲性。色等一一問答亦爾。復次一切法皆以空無相無願爲自性。皆以真如法界等爲自性。善現白佛。若一切法皆以無性爲自性者。初發心菩薩成就何等善巧方便。能行布施等。能住內空等。成熟有情。嚴淨佛土。佛言。謂雖修學知一切法皆以無性爲其自性。而常精勤成熟有情。嚴淨佛土。雖常精勤成熟有情。嚴淨佛土。而勤修學知諸有情及諸佛土。皆以無性爲其自性。是菩薩雖行布施等。住內空等。

學善提道。而知善提道。無性爲自性。如是修行布施等。安住內空等。學善提道。乃至未得如來十力等。皆名學善提道。未得圓滿。若於此道已得圓滿。則於一切波羅密多亦已圓滿。由一刹那相應妙慧。證得如來一切相智。以無障礙清淨佛眼。徧觀十方三界諸法。尚不得無。况當得有。如是菩薩最勝善巧方便。謂行般若。觀一切法尚不得無。况當得有。常作是念。諸法皆以無性爲性。如是無性。本性自爾。非佛等所作。以一切法皆無作者。離作者故。善現白佛。一切法皆無知爲性。云何菩薩修行般若。顯示諸法。若有若無。佛言。隨世俗故。顯示非隨勝義。又問。世俗勝義。爲有異不。佛言。不也。世俗真如。即是勝義。顛倒妄執。於此真如。不知不見。哀愍彼故。隨世俗相。顯示諸法。若有若無。復次。有情於蘊等法。起實有想。菩薩哀愍彼故。分別諸法。若有若無。令皆非實有。巧便行品第六十三。善現白佛。當於何處行菩薩行。佛言。當於色等空行菩薩行。如佛善提。於諸法中。不作二相。次答佛陀名義。善提名義。次問。行布施等時。住內空等時。於何等法。爲益爲損。爲增爲減。爲生爲滅。爲染爲淨。佛言。菩薩爲善提故。行布施等時。住內空等時。於一切法。無益無損。乃至無染無淨。又問。若爲善提。行深般若。於一切法。都無所緣。而爲方便。不爲益。不爲損。乃至不爲染。不爲淨。故現在前者。云何攝受六度。二十空等。佛言。不以二故。攝受施等。乃至不以二故。證得善提。又問。若不以二故。攝受施等。云何從初發心。乃至最後心起。於一切時。善法增長。佛言。若以二故。行則諸善法不得增長。行不二故。善根堅固。不可制伏。次明若不敬供諸佛。不能圓滿善根。不得善友攝受者。不能證得一切智智。又雖敬供佛等。遠離方便善巧力故。猶不能證一切智智。因即廣明方便善巧修行六度之相。及修一切善法之相。徧學道品第六十四。佛

告善現。菩薩能於色等無性自性無動。善現問言。有性法能現證無性不。無性法能現證有性不。有性法能現證有性不。無性法能現證無性不。佛皆答言。不也。又問。將無世尊不得現觀。佛言。有得現觀。然離四句。非有非無。絕諸戲論。乃名現觀。得亦如是。又問。何爲戲論。佛言。觀色等若常無常。乃至若有所徧知。若非所徧知。是爲戲論。復次。若作是念。苦應徧知。集應永斷。滅應作證。道應修習。應修四靜慮等。應超預流果等。應行布施等。應住內空等。應趨入正性離生。應圓滿十地正行。應成熟有情。應嚴淨佛土。應起佛十力等。應斷煩惱習氣。應證無上菩提。是爲戲論。復次。菩薩行深般若時。應觀色等若常若無常等。不可戲論。故不應戲論。復次。觀苦聖諦。若應徧知。若不應徧知。不可戲論。故不應戲論。以一切法有性不能戲論。有性無性不能戲論。無性有性不能戲論。無性無性不能戲論。有性離有無性。法不可得。若能戲論。若所戲論。若戲論處。都無所有。是故色無戲論。乃至佛菩提無戲論。菩薩應行無戲論。甚深般若。善現白佛。云何觀一切法皆無戲論。佛言。觀色等無自性。若法無自性。則不應戲論。是故色等無戲論。又問。菩薩用何等道。得入正性離生。佛言。非用聲聞道。非用獨覺道。非用佛道。然於一切道先徧學已。用菩薩道而入正性離生。謂菩薩從初發心。勇猛勤修六度。以勝智見。超過靜觀。至獨覺等八地。用道相智而入正性離生。復用一切相智。永斷習氣。入如來地。乃成一切智智。是菩薩所學第八。乃至獨覺。若智若斷。皆是菩薩摩訶薩忍。又問。云何當起一切淨道相智。佛言。若諸行狀相。能顯發起淨道相智。菩薩徧現等覺。如實爲他宣示施設。令諸有情得無倒解。趣向利樂。菩薩應於音聲語言。皆得善巧。徧爲有情說法。令所聞皆如谷響。雖有解了。而無執著。應如實知有情隨眠意樂種種差別。應

如實知六道因果。隨其所應。遮障彼道。及彼因果。應如實知三十七品。乃至三智。三乘道及因果。以如是道。安立有情。善現白佛。若一切種善提分法。及諸善提。皆非相應。非不相應。無合。無散。無色。無見。無對。一相。所謂無相。云何如是善提分法。能取善提。譬如虛空。於一切法。無取。無捨。自相空故。諸法亦爾。自相皆空。非於餘法。有取有捨。佛言。如是如是。然諸有情。於一切法。自相空義。不能解了。哀愍彼故。方便宣說善提分法。能取善提。復次若色等一切法。於聖法毗奈耶中。皆非相應。非不相應。乃至一相。無相。佛爲饒益有情。令得正解。入法實相。以世俗說。非以勝義。菩薩於二乘法。學智見已。如實通達。不應攝受。於一切智智相應諸法。學智見已。如實通達一切種相。應可攝受。善現又問。若菩薩不於如是諸法相學。亦應不於諸行相學。既不能學。云何能超二地。乃至以三乘法安立有情。令脫衆苦。佛言。若一切法實有相者。菩薩應於中學。以一切法實非有相。無色。無見。無對。一相。所謂無相。是故不於有相法學。亦不於無相法學。又問。若爾。云何菩薩能修般若。超二乘地。乃至安立有情。佛言。如汝所說。一切法非有相。非無相。非一相。非異相。若菩薩知一切法。若有相。若無相。若一相。若異相。咸同一相。所謂無相。修此無相。是修般若。又問。云何修此無相。是修般若。佛言。若修遣色等。亦遣此修。是修般若。又問。云何修遣色等。亦遣此修。佛言。若念有色等。有遣此修。非修般若。何以故。非有想者能修般若。是故修遣色等。亦遣此修。是修般若。復次住有想者。若修布施等。若住內空等。必當執有我及我所。便著二邊。不解脫生死。無道。無涅槃。云何如實能修布施等。能住內空等。又問。何等是有。何等是非。佛言。二是有。不二是非。有。色。想等爲二。色。想等空爲不二。乃至一切想皆爲二。乃至一切二皆是有。乃至一切有皆有。

生死不能解脫。諸想空者。皆爲無二。皆是非有。皆無生死。則能解脫。由此一切有二想者。定無六度。無道無果。亦無現觀。下至順忍。彼尙非有。况有色等偏知。况得三乘聖果。三漸次品第六十五。善現白。佛住有想者。若無道果。住無想者。豈有道果。佛言。如是。又問。菩薩行深般若時。爲有有想。有無想。不爲有色等想。不爲有色等想。有色等斷想。不佛言。於一切法。皆無有想。亦無無想。當知即是順忍。即是修道。即是得果。當知無性。即菩薩道。無性。即菩薩現觀。又問。若一切法。皆以無性爲自性者。云何如來現等覺。已於一切法。及諸邊界。皆得自在。佛言。我本修學菩薩道時。無倒修行六度。入四靜慮。於諸靜慮。及靜慮支。雖善取相。而無所執。都無味著。都無所得。無所分別。具足安住。善淳熟已。發起五通。亦無所執。乃至無所分別。以一剎那相應妙慧。證得無上菩提。謂現等覺。四諦。都無所有。成就十力等。無邊功德。安立三聚有情。令獲利樂。又問。云何如來能起無性爲自性。四靜慮。能發無性爲自性。五神通。能證無性爲自性。菩提。能立無性爲自性。有情。作三聚已。令獲利樂。佛言。若諸欲惡不善法等。有少自性。或復他性爲自性者。我不應通達。彼無性爲自性。已能入靜慮。以彼無自他性。但以無性爲自性。故我通達。已能入靜慮。廣說五通。乃至有情。亦復如是。又問。云何於無性爲自性法中。有漸次業。漸次學。漸次行。由此證得菩提。佛言。菩薩聞一切有情。一切行。一切法。皆以無性爲自性。思惟勝解。發起菩提。爲度有情。作漸次業。修漸次學。行漸次行。如諸過去菩薩。次第修行六度。六念。二十空等。如是學一切法。皆以無性爲其自性。於中尙無少念可得。况有念色等。又問。則應無色等。乃至一切法。皆應是無。佛言。於一切法。皆以無性爲自性。中有性無性爲可得。不答言不也。佛言。若有性無性。俱不可得。云何可爲是。

問。則應無色等。善現白佛。我於是法。無惑無疑。然當來世。有苾芻等。求三乘者。彼作是說。佛說一切法。皆以無性爲其自性。誰染誰淨。誰縛誰解。彼於染淨縛解。不了知故。破戒破見。破威儀。破淨命。當墮三塗。受諸劇苦。輪迴生死。難得解脫。我觀未來。有是可怖畏事。故問如來。如是深義。佛言。善哉。如汝所說。有性無性。俱不可得。不應於此。執有無性。無相無得。品第六十六。善現白佛。若一切法。皆以無性爲自性者。菩薩見何等義。爲利有情。求趣菩提。佛言。以一切法。皆以無性爲自性。故菩薩爲利有情。求趣菩提。何以故。有情具斷常見。住有所得。難可調伏。恐癡顛倒。難可解脫。由有所得。想無得。無現觀。亦無菩提。若無所得。即是得。即是現觀。即是菩提。以不壞法界故。若有於是。無所得中。欲有所得。欲得現觀。欲得菩提。當知彼爲欲壞法界。又問。云何得有極喜地等。佛言。以一切法。無所得故。得有極喜地等。又問。六度有何差別。佛言。無所得者。皆無差別。爲欲令彼。有所得者。離染著故。方便宣說。有差別相。又問。何故無所得者。皆無差別。佛言。不得布施。不得施者。不得受者。不得所施。而行布施。乃至不得一切佛法。而得無上菩提。菩薩行是無所得般若。魔及眷屬。所不能壞。又問。云何一心具攝一切佛法。佛言。所行布施等。所住內空等。不離般若。皆爲般若之所攝受。如是一剎那心。則能具攝一切諸法。又問。云何諸有所作。不離般若。般若所攝受故。一剎那心。則能具攝施等。佛言。菩薩所行布施等。所住內空等。皆爲般若所攝受故。遠離二想。又問。云何雖行施等。而無二想。佛言。爲欲圓滿施度故。即於施度中。攝受一切佛法。而行布施。由是因緣。而無二想。廣說。乃至修八十好。亦如是。復次行施等時。住無漏心。而行施等。故無二想。又問。云何住無漏心。而行施等。佛言。以離相心。修行施等。又問。於一切無相無覺。無得

無影無作法中。云何能圓滿施等。佛言。以離相無漏之心而行施等。一一廣明行相。無雜法義品第六十七。善現白佛。云何於一切無雜無自相空法中能圓滿修六度。云何於一切無漏無差別法中。施設如是諸法差別。及可了知。云何於般若中攝受一切世出世法。云何於一切異相法中。施設一相。所謂無相。及於一相無相法中。施設種種差別法相。佛言。安住如夢如響。乃至如變化事。五取蘊中。修行六度。如實了知。如夢等。五取蘊皆無相。所以者何。諸夢響等。皆無自性。無性則無相。無相則一相。由此因緣。布施無相。施者無相。受者無相。施物無相。若如是知而行布施。則能圓滿施度。則不遠離六度。則能圓滿一切佛法。廣說乃至般若亦爾。諸功德相品第六十八。善現白佛。云何如夢響等。而可安立。是善是非善。乃至是菩提。是能證耶。佛言。愚夫異生。得夢。得見夢者。乃至得變化事。得見變化事者。得已。顛倒執著。造身口意業。福非福。不動行。往來生死。流轉無窮。菩薩行深般若。觀察畢竟無際二空。安住畢竟無際二空。爲彼有情。宣正法言。色等是空。無我我所。色等如夢等。都無自性。當知此中無色等。無夢等。亦無見夢者等。一切法皆無實事。皆以無性而爲自性。汝等虛妄分別力故。無色中見有色。乃至無無爲法中。見有無爲法。當知蘊處界等一切法性。皆從衆緣和合。建立顛倒所起。諸業異熟之所攝受。汝等何爲。於是虛妄無實事法。起實事想。是時菩薩修行般若。方便善巧。拔濟有情。令修施等一切佛法。若諸有情。耽著有爲施等及果。以諸方便。安慰拔濟。令住三乘。如是菩薩觀察。安住畢竟無際二空。雖知諸法如夢響等。而能安立。是善是非善等。皆無雜亂。甚奇希有。次更分別菩薩甚奇希有之法。謂住異熟生布施等法。及四攝等。善現白佛。若一切法。一切有情。自性畢竟皆不可得。云何菩薩

修行布施等。安住內空等。乃至住異熟生六神通已。爲諸有情說法。世尊。不可得中。無有情。無有情施設。無色等。無色等施設。一切有情法及施設。既不可得。云何菩薩爲諸有情說法。何以故。菩薩行深般若時。尚不得菩提。况有菩提分法可得。尚不得菩薩。况有菩薩法可得。佛言。如是一切有情。有情施設。一切法。法施設。皆不可得。無所有故。當知內空。乃至無性自性空。眞如空。乃至不思議界空。苦聖諦空。集滅道聖諦空。色空。乃至八十隨好空。見一切法皆悉空已。爲諸有情說法。令離顛倒。而於有情及法。都無所得。於諸空相。不增不減。無取無捨。由是雖說諸法。而無所說。於一切法。得無障智。不壞諸法。無二分別。如化如來。教所化衆。雖不分別破壞法相。而能如實安立有情。住所應住。雖於有情及法。都無所得。而令有情解脫妄想顛倒執著。所以者何。色等本性無縛無脫。則非色等。畢竟淨故。復次。以無所住爲方便故。住色空等。色等無所住。色空等無所住。色等無自性不可得。色空等無自性不可得。非無自性不可得法有所住故。非無性法住無性法。非有性法住有性法。非無性法住有性法。非有性法住無性法。非自性法住自性法。非他性法住他性法。非自性法住他性法。非他性法住自性法。何以故。是一切法皆不可得。不可得法。當何所住。菩薩以是諸空修遣諸法。亦能如實說示有情。善現白佛。若眞法界眞如實際無轉越者。色等與法界眞如實際爲有異不。佛言。不異。又問。若不異者。云何世尊安立黑法感黑異熟。白法感白異熟。非黑非白法感非黑非白異熟。佛言。依世俗諦安立。不依勝義。勝義諦中。不可說有因果差別。色等無生無滅。無染無淨。以畢竟空無際空故。又問。若依世俗安立因果。不依勝義者。則愚夫異生皆應有三乘果。佛言。愚夫異生。不如實知世俗諦及勝義諦。無聖道。無修聖道。云

何有聖果。唯諸聖者。如實知二諦。有聖道。有修聖道。得有聖果差別。又菩薩自於諸法無所執著。亦能教他於法無所執著。無執著故。於一切處皆得無礙。如佛所變化者。雖行施等。而於彼果不受不著。唯爲有情般涅槃故。諸法平等品第六十九。善現白佛。云何於一切法。善達實相。佛言。如佛所變化者。不行於貪等。乃至不行於道果。於一切法都無所行。是爲善達諸法實相。謂於法性都無分別。又問。一切色等皆如化。不佛言。如是一切法皆如化。又問。諸所變化。皆無實色等。云何菩薩於諸有情。有勝士用。佛言。菩薩頗見有情可脫三界不。答言。不也。佛言。菩薩於一切法。知見通達。皆如幻化。又問。爲何事故修行施等。佛言。若諸有情。能知皆如幻化。則菩薩不應無數劫爲有情行道。以有情自不能知。皆如幻化。是故菩薩爲諸有情行道。復次若菩薩不如實知。皆如幻化。則不應無數劫修菩薩行。嚴淨佛土。成熟有情。以如實知。皆如幻化。故無數劫修菩薩行。又問。若一切法如夢幻等。所化有情。住在何處。拔濟令出。佛言。住在名相虛妄分別。拔濟令出。名皆是客。皆是假立。皆屬施設。謂此名色等。愚夫妄執。菩薩教令遠離。說離名法相有二種。一色相。二無色相。愚夫執著。取相分別。生諸煩惱。菩薩教令遠離。二相。雖教安住無相界中。而不令其墮二邊執。謂此是相。此是無相。又問。若一切法但有名相。皆是假立。分別所起。非實有性。云何於諸善法。能自增進。亦能令他增進。佛言。若諸法中少有實事。非但假立有名相者。則應於善法。不自增進。不令他進。以諸法中無少實事。是故以無相爲方便。能圓滿般若等諸善法。亦令他滿。復次若諸法中有毛端量實法相者。則菩薩於一切法。不應覺知無相。無念亦無作意。無漏性已。證得菩提。安立有情於無漏法。何以故。諸無漏法。皆無相。無念。無作意。故。安立有情於無漏。

法。乃名真實饒益他事。復次菩薩學三脫門。則能學五蘊等無量無邊佛法。次廣答學五蘊等。又問。若行般若時。如實了知五蘊等法展轉差別。豈不以色等壞法界耶。法界無二無差別故。佛言。若離法界。餘法可得。可言彼法能壞法界。然離法界無法可得。故無餘法能壞法界。菩薩應學法界無二無別。不可壞相。又問。欲學法界。當於何學。佛言。當於一切法學。以一切法皆入法界故。不由佛說。苦學一切法。即學法界。又問。若一切法皆入法界。無二無別。云何菩薩常學般若。亦學靜慮等。非法界中有如是等種種分別。將無由此分別。行於顛倒。無戲論中。起諸戲論。世尊。法界非色等。亦不離色等。法界即色等。色等即法界。佛言。如是色等非色等。亦不離色等。別有法界。色等即法界。法界即色等。菩薩知一切法。即法界。以方便善巧無名相法。為諸有情寄名相說。謂此是色等。如幻師幻作種種。無有實事可得。

卷第二十一

大乘經藏 般若部第三之六

不可動品第七十。善現白佛。若有情及有情施設畢竟不可得。菩薩為誰修行般若。佛言。以實際為量。故修行般若。以有情際不異實際。以不壞實際法。安立有情於實際中。問言。若有情際即是實際。則為安立實際於實際。則為安立自性於自性。佛言。不可安立實際於實際。亦不可安立自性於自性。然般若方便善巧。能安立有情於實際中。而有情際不異實際。如有情際與實際無二無二分。又問。何等

名爲方便善巧。佛爲廣說。又問。本性空中。有情及法俱不可得。亦無非法。云何菩薩爲諸有情求證菩提。常作饒益。佛言。以一切法皆本性不空。是故菩薩住一切法。本性空理。修證菩提。爲饒益有情。說本性空法。復次本性空中。我等不可得。色等不可得。雖爲有情說本性空。而諸有情實不可得。哀愍彼墮顛倒法故。拔濟令住無顛倒法。謂無分別。此無所有。即本性空。菩薩安住此中。見諸有情墮顛倒想。方便善巧。令得解脫。無我我想。乃至亦令解脫。無菩提菩提想。當知此中無我可得。乃至亦無菩提可得。菩薩唯爲諸法本性空故。求趣菩提。是本性空。前後中際。常本性空。未曾不空。即本性空。名爲佛眼。善現白佛。菩薩甚爲希有。行本性空。而於本性空。曾無失壞。謂不執色等異本性空。世尊。色等即是本性空。本性空即是色等。佛印述之。復次若色等異本性空。本性空異色等。色等非本性空。本性空非色等。則菩薩不應觀一切法皆本性空。證得菩提。以色等不異本性空。云云。是故觀一切法皆本性空。證得菩提。以離本性空。無有一法是實。是常。可壞。可斷。本性空中。亦無一法是實。是常。可壞。可斷。唯諸愚夫。迷謬顛倒。起別異想。謂執色等異本性空。不如實知色等。便執著色等。計我我所。著內外物。受後色等。菩薩住本性空。修行般若。不執受色等。亦不壞色等。若空若不空。所以者何。色等不壞。空不壞。色等。謂此是色等。此是空。譬如虛空不壞。虛空如是。諸法俱無自性。不可相壞。謂此是空。此是不空。善現白佛。本性空中。都無差別。菩薩爲何所住。發無上心。無上菩提。無二行相。非二行相。能證菩提。佛言。如是菩提。無二。亦無分別。若行二相。有分別者。必不能證。菩薩不於菩提。行於二相。亦不分別。都無所住。發無上心。於一切法。不行二相。亦不分別。都無所行。則能趣證菩提。謂不於色等行。不緣名聲執我我所。

不作是念。我行於色等。復次菩薩所有菩提。非取故行。非捨故行。如佛化身。如羅漢夢。都無行處。本性空故。又問。若都無行處。豈不行布施等。佛言。菩薩所有菩提。雖無行處。而要行施等。乃得菩提。又問。若無行處。將無不住施等。久修令滿。佛言。雖無行處。而要住施等。久修令滿。乃得菩提。復次菩薩欲得菩提。應住色等本性空。應住一切法。一切有情本性空。修諸功德。令圓滿已。便證菩提。是本性空。最極寂靜。無有少法能增能減。能生能滅。能斷能常。能染能淨。能得果。能現觀。依世俗言說施設法故。說修般若。如實了知本性空已。證得菩提。非真勝義。真勝義中無色等可得。菩薩修行般若。從初發心。雖極猛利。爲諸有情行菩提行。而於此心。於諸有情。於大菩提。於佛菩薩。都無所得。善現白佛。云何行菩提行。云何能得菩提。佛言。汝得果時。頗見有情。若心若道。若諸道果。有可得。不言不也。佛言。云何言得阿羅漢果。答言。依世俗說。不依勝義。佛言。菩薩亦復如是。成熟有情品第七十一。善現白佛。若菩薩修行布施等。安住內空等。若未圓滿。不能證得菩提。云何修菩薩道。令得圓滿。佛言。菩薩方便善巧。修行布施等。不得布施等。不得能修。不得所修。不得所爲。亦不遠離。如是諸法。而行布施等。則能圓滿。修菩薩道。能證菩提。舍利子問。云何勇猛正勤修菩薩道。佛言。方便善巧。不和合色等。不離散色等。以如是諸法。皆無自性。可合離故。又問。若一切法都無自性。可合離者。云何引發般若於中修學。能得菩提。佛言。如是要學般若。乃證菩提。非無方便善巧。而可證得。菩薩行般若時。不見有法。自性可得。當何所取。如實了知一切法。性皆不可取。是不可取。波羅密多。即是無障波羅密多。即是般若波羅密多。應於中學。又問。若一切法。都非實有。依何等事。而可了知。此是異生。此是異生法。乃至此是如來。此是如來法。

佛言。爲實有色等。如諸愚夫異生執不。一一答言不也。但由顛倒愚夫異生有如是執。佛言。菩薩修行般若方便善巧。雖觀諸法都非實有。而依世俗發趣菩提。爲有情說。令得正解。又問。云何方便善巧。雖觀諸法皆無自性。而依世俗發趣菩提。爲有情說。令離顛倒。佛言。方便善巧者。謂都不見有少實法。可於中住。而有罣礙。有退沒。心劣弱。生懈怠。唯有愚夫。迷謬顛倒。執著色等。菩薩觀一切法。本性空寂。自性空寂。修行般若。爲有情說法。令得三乘。於諸有情。非有所得。唯有世俗假說有情菩薩安住二諦。爲有情說法。雖二諦中有情不可得。有情施設亦不可得。而方便善巧。爲有情說法。有情聞已。於現法中。尚不得我。何況當得所求果證。舍利子。若有情類。諸趣生死。先有後無。菩薩如來。應有過失。先無後有。理亦不然。如來出世。若不出世。法相常住。終無改轉。尚無我等。況有色等。既無諸法。何有諸趣生死。生死既不可得。云何令得解脫。唯依世俗假說。爲有以如是法。自性皆空。菩薩從過去佛。如實聞已。爲脫有情顛倒。執著發趣菩提。於發趣時。不作是念。我於此法。已得當得。令彼有情。已度當度。是菩薩常於菩提不起猶豫。雖脫有情迷謬顛倒。諸趣生死。而無所得。但如幻事。善現白佛。云何修行布施方便善巧。成熟有情。佛廣答之。又問淨戒及餘大菩提道。佛略答之。嚴淨佛土品第七十二。善現念言。何法名菩薩道。佛言。六度三十七品。二十空等。總一切法。皆菩薩道。若菩薩不學一切法。終不能得一切智。善現問言。若一切法自性皆空。云何學一切法。佛言。以一切法自性皆空。是故菩薩能得菩提。若諸有情。知一切法皆自性空。則菩薩不應學一切法。證得菩提。爲有情說。菩薩初修學時。應審觀察諸法自性。都不可得。唯有執著和合所作。我當審察。皆畢竟空。不應執著色等。雖無執著。而於諸法常學無

倦。觀察了知有情心行。但行虛妄所執。方便善巧。教授教誡。令修施等。令勿恃此而生憍逸。此中都無堅實事故。如是以無所住而爲方便。雖行施等。而無所住。以如是自性行者。行相一切空故。善現白佛。若一切法皆不生者。云何菩薩起菩提道。佛言。諸無所作無所趣者。知一切法皆不生故。然諸有情。不了諸法。法界法爾常住。菩薩爲饒益故。起菩提道。又不用道得菩提。亦不用非道得菩提。菩提即是道。道即是菩提。菩薩若已圓滿施等妙法。以一剎那金剛喻定相應妙慧。永斷二障。麤重習氣相續。證無上覺。乃名如來。於一切法。得大自在。盡未來際。利樂有情。又問。云何嚴淨佛土。佛言。從初發心。乃至究竟。常清淨。自他三業。麤重。則能嚴淨佛土。十惡是麤重。五分不清淨。六蔽。離三十七品等一切善法。貪二乘果證。起色等想。皆名麤重。遠離是已。自行施等。教他亦爾。持此善根。與諸有情平等共有。迴向所求嚴淨佛土。令速圓滿。利樂有情。又以通願力。施妙七寶。妙音樂。妙香華。妙飲食。塗香衣服。妙五塵境界。莊嚴相好。又成正覺時。所化有情。咸生彼土。土中不聞有三惡趣等聲。但聞空無相無願等聲。十方如來。皆稱讚彼名。及自說法。有情不疑。又於所化衆生。不具善根。墮惡趣者。以神通方便。教化令離惡趣。修習勝行。定得無上正等菩提。淨土方便品第七十三。善現白佛。菩薩住何等聚。佛言。正定聚。又問。何乘正定聚。佛言。佛乘。又問。何時安住。佛言。初心不退。最後身皆悉安住。又問。爲墮惡趣不。佛言。由菩薩初發心時。修諸勝行。伏斷一切惡不善法。不墮八難。善現白佛。何故世尊說自本生。亦生惡趣。爾時善根爲何所在。佛言。非由不淨業。受惡趣身。但爲利樂有情。由故思願。而受彼身。不爲傍生過失所

染。菩薩爲得菩提。一切善法。皆應圓滿。若一切善法。未能圓滿。而得菩提。無有是處。受傍生身。如佛化。作如羅漢。亦如幻作。安住般若。能作如是善巧方便。又問。云何引發神通。能往十方。供佛聞法。種種善根。佛言。由徧觀空。方便善巧。能引發殊勝神通。自在成熟。有情嚴淨。佛土證得菩提。若遠離神通。如鳥無翅。不能飛翔。菩提資糧。未具。不得菩提。一切善法。皆是菩提資糧。無性自性品第七十四。佛答善現。如是法。即菩薩法。亦即佛法。雖位有異。而法無別。善現又問。自相空中。云何得有種種差別。佛言。有情於一切法。自相空理。不能盡知。造作諸業。罪業墮三塗。福業生人天。不動業生上二界。無漏業得二乘果。若知諸法。自相皆空。或入菩薩地。或證佛菩提。由此因緣。諸菩薩修行布施等。安住內空等。令圓滿已。證得菩提。說名如來。利樂有情。諸有所爲。常無失壞。不墮輪迴。又問。佛證菩提。爲得諸趣生死。法不爲得黑業白業。黑白業非黑白業。不佛皆言不也。又問。云何施設此是地獄。乃至此是如來。佛言。以諸有情。不知諸法。自相空故。流轉受苦。菩薩聞一切法。自相空已。求證菩提。設教拔諸有情生死。又問。爲由四諦得涅槃。爲由四諦智得涅槃。佛言。非由四諦。四諦智得涅槃。我說四諦平等性。即是涅槃。但由般若證平等性。名得涅槃。菩薩修行般若時。無有少法。不如實見。於一切法。如實見時。都無所得。則如實見一切法。空。能入菩薩正性離生。即住菩薩種性地中。不從頂墮。安住奢摩他地。能決擇一切法。及隨覺四聖諦。起隨順趣。向臨入菩提之心。於一切法。觀察實相。次更爲廣說夢喻。像喻。響喻。陽燄喻。光影喻。幻事喻。變化喻。尋香城喻。勝義瑜伽品第七十五。善現。白佛。諸見實者。無染無淨。不見實者。亦無染無淨。乃至無自性。有自性法。亦無染無淨。何故有時。佛說有清淨法耶。佛言。我說一切法平。

等性。爲清淨法。依世俗說。不依勝義。勝義諦中。無分別。無戲論。一切音聲名字路絕。又問。若一切法如夢像等。云何菩薩依止。如是非真實法。發菩提願。佛言。汝所說法。豈不亦如夢像等耶。答言。如是。云何菩薩行般若時。發誠諦言。我當圓滿一切功德。利樂有情。非夢所見物等。能行布施等法。况能圓滿。佛言。如是。如汝所說。非實有法。尙不能行施等。况能圓滿。復次施等非實有故。不能證得菩提。如是諸法。一切皆是思惟所造作法。皆不能得一切智智。如是諸法。於菩提道雖能引發。而於其果無資助能。由是諸法無生無起無實相故。菩薩從初發心。雖起種種身語意善。而知一切如夢像等。復次如是諸法。雖非實有。若不圓滿。決定不能成熟有情。嚴淨佛土。證得菩提。復次菩薩隨所修行一切善法。皆如實知如夢像等。復次菩薩於一切法。不取爲有。不取爲無。何以故。施等不可取故。乃至無爲法。亦不可取故。知一切法不可取已。求趣菩提。所以者何。以一切法皆如夢等。然諸有情不知不見。爲度彼故。求取菩提。復次菩薩從初發心。爲有情故。修行施等。不爲己身。非爲餘事。復次菩薩見諸愚夫。於非我中。住我想。乃至非使見者。而住使見者。想深生憐愍。方便教他。令離顛倒妄想。執著安置。無相甘露界中。由此方便。自於諸法無所執著。亦能教他無所執著。此依世俗。不依勝義。佛證菩提所得佛法。亦依世俗故說。若依勝義。能得所得。俱不可得。若謂此人得如是法。便執有二。執有二者。不能得果。亦無現觀。執無二者。亦復如是。若無二無不二。即名得果。亦名現觀。善現復問。何謂法平等性。佛言。若於是處。都無有性。亦無無性。亦不可說爲平等性。如是乃名法平等性。既不可說。亦不可知。除平等性無法可得。離一切法無平等性。異生聖者。俱不能行。非彼境故。又問。如來於一切法。皆得自在。云何可言法平等。

性亦非所行境界耶。佛言。如來於一切法。雖得自在。若平等性與佛有異。可言是所行境界。然平等性與佛無異。云何可說佛行彼境界。又問。平等性中。異生聖者法及有情俱無差別。云何三寶出現世間。佛言。佛法僧寶與平等性。各有異耶。答言。皆無有異。然佛於無相中。方便善巧建立差別。佛言。如是。若佛不證菩提。設證菩提。不爲有情施設諸法差別之相。有情能自知此是地獄。乃至此是如來等。不答言。不也。佛言。是故佛於無相法。方便善巧。雖爲有情施設差別之相。而於平等法性。都無所動。又問。一切異生等。亦於平等法性無所動。不佛言。如是。又問。若一切法平等性。令一切法及諸有情相各異。故性亦應異。是則法性亦應各異。云何於諸異相法。等可得安立法性一相。云何菩薩修行般若。不分別法及諸有情有種種相。若不分別。則應不能修行般若。不能從一地至一地。不能趣入正性離生。超二乘地。不能圓滿神通。乃至不能證得菩提。佛言。諸色等法性。是空性。不答言。如是。佛言。於空性中。色等異相爲可得。不答言。不也。佛言。由此當知平等法性。非色等。不離色等。又問。平等法性。是有爲。是無爲。佛言。非是有爲。非是無爲。然離有爲法。無爲法不可得。離無爲法。有爲法亦不可得。即有爲無爲平等法性。說名勝義。修般若時。不動勝義。而行菩薩行。無動法性。品第七十六。善現白佛。平等法性。皆本性空。於有無法。非能所作。云何不動勝義。而作菩薩所應作事。佛言。若諸有情。自知諸法皆本性空。則佛菩薩不現神通作希有事。謂於諸法本性空中。雖無所動。而令有情遠離妄想顛倒。安住無爲界。解脫生死苦。無爲界者。即諸法空。依世俗說。名無爲界。又問。由何空故。說諸法空。佛言。由想空故。復次。無一法非化。是諸化者。無不皆空。依如是法。施設異生。乃至如來。又問。世界蘊處界等。可皆是化。出世波羅密多。

等。豈亦是化。佛言。無非是化。然有是聲聞所化。有是獨覺所化。有是菩薩所化。有是如來所化。有是煩惱所化。有是善法所化。由此說一切法。皆如變化。若法不與生滅相合。是法非化。即是涅槃。又問。佛說無有少法非自性空。云何涅槃。可言非化。佛言。此自性空。非佛等所作。其性常空。此即涅槃。非實有法名爲涅槃。可說無生無滅非化。常啼菩薩品第七十七。善現白佛。云何教授教誡初業菩薩。令其信解諸法自性畢竟皆空。佛言。豈一切法先有後無。然一切法非有非無。無自性。無他性。先既非有。後亦非無。自性常空。無所怖畏。應如是教初業菩薩。令其信解。復次欲求般若。應如常啼菩薩。今在大雲雷音佛所。修行梵行。本求般若時。不惜身命。不顧珍財。不徇名譽。不希恭敬。居阿蘭若。聞空中聲。從是東行。復作是念。我寧不問至何城邑。復從誰聞。悲泣歎恨。有佛像現。爲說過五百踰繕那妙香城中。法涌菩薩。常啼聞已。於一切法中。起無障智見。即入五十四三摩地。見十方佛。宣說般若。咸共慶讚。令歡喜已。忽然不現。常啼從三昧起。作是思惟。佛從何來。今往何所。我當疾詣法涌菩薩。彼能爲我斷如是疑。漸次至一大城。高唱賣身。魔隱蔽其聲。不令人聞。唯長者女宿善根力。魔不能蔽。帝釋化作少婆羅門。試之。買血髓心。常啼出血。出髓。將欲剖心。長者女止之。帝釋愧謝。長者女白父母同往。至妙香城。以供養具。分作二分。先持一分。詣寶臺所。供養般若。復持一分。供養法涌菩薩。菩薩威神。令所散華。合作一妙華臺。香成一妙香蓋。衣成一妙寶帳。長者女并諸眷屬。皆發無上心願。常啼自述始末。并問佛從何來。今往何所。法涌菩薩。品第七十八。法涌告常啼言。法身無所從來。亦無所去。諸法實性。皆不動故。兼說陽燄幻事。鏡像谷響。光影尋香城。變化事。夢所見等喻。若執如來身是名是色。有來有去。迷法性。

故。愚癡流轉。遠離般若。若於甚深法義。能如實知。不執佛身是名是色。亦不謂佛有來有去。由不執故。能行般若。勤修佛法。鄰近菩提。復次如海中寶。非十方來。非有情作。亦非無因緣生。有情善根力故。海有寶生。善根力盡。令彼滅沒。諸有爲法。緣合故生。緣離故滅。都無生者滅者。是故諸法。無來無去。佛身亦然。依本修淨行圓滿爲因緣故。及依有情先修見佛業成熟故。有如來身出現於世。因緣和合力盡。即便滅沒。是故諸佛無來無去。又如罽襜種種因緣和合。而有聲生。是聲生位。無所從來。於息滅時。無所至去。佛身亦爾。說是法時。大千六種變動。八千衆生。證無生忍。八十那庾多衆生。發無上心。八萬四千衆生。生淨法眼。常啼上昇虛空。七多羅樹。帝釋化作無量香華助之。奉散供養。下禮雙足。以身奉充。給使。時長者女及諸眷屬。亦以身奉常啼。常啼以奉法涌。法涌受已。還施常啼。日將欲沒。法涌還宮。常啼於七歲中。不坐不臥。唯行唯立。長者女等亦爾。過七歲中。空中聲言。卻後七日。法涌當從定出。宣說正法。常啼敷師子座。求水灑地。魔隱蔽水。常啼刺身出血。長者女等亦爾。帝釋變血成栴檀水。化作妙華。奉施常啼。常啼受已。分作二分。一分嚴布其地。一分擬奉大師。法涌過七日已。昇座宣說般若。常啼聞已。得六十億三摩地門。現見十方各恆沙佛。聞說如是般若。結勸品第七十九。先向善現結勸。次囑阿難受持。已上共四百卷。

卷第二十二

大乘經藏 般若部第三之七

○第二分緣起品第一。佛住鷲峰山。與五千苾芻。五百苾芻尼等俱。並如初分中說。歡喜品第二。佛知有緣衆。一切來集。告舍利子言。菩薩欲於一切法。等覺一切相。當學般若。舍利子歡喜禮問。佛言。應以無住而爲方便。安住般若。所住能住。不可得故。復以無所得而爲方便。應修習四念住。乃至無量無邊佛法。如是諸法。不可得故。復次欲疾證一切智智。乃至成就無量功德。當學般若。若修行般若。天人歡喜。舍利子問。菩薩決有父母妻子等耶。佛言。或有或無。或示受五欲。厭捨出家。觀照品第三。舍利子問。云何修行般若。佛言。應如是觀。不見有菩薩。不見菩薩名。不見般若。不見般若名。不見行。不見不行。何以故。菩薩自性空。菩薩名空。色等自性空。不由空故。色等空。非色等。色等不離空。空不離色等。色等即是空。空即是色等。如是自性。無生無滅。無染無淨。不見生滅染淨故。不生執著。觀一切法。但有名實。不可得。如是修行般若。除諸佛慧。二乘等慧。所不能及。以不可得空故。舍利子問。三乘般若差別。旣不可得。云何說菩薩所修般若。二乘所不能及。佛言。菩薩皆作是念。我常修行六度。成熟有情。嚴淨佛土。滿佛十力等法。度無量衆。譬如日光。照無不徧。二乘如螢。無如是念。依菩薩故。一切善法出現世間。便有人大三乘。又問。與何法相應故。言與般若相應。佛言。與色等空相應故。不見色等。若相應若不相應。若生若滅。若染若淨。無有少法與法合者。以本性空故。復次入一切法自相空已。不觀一切法。若合若散。復次不著色等。有性無性。常無常。乃至無願有願。不作是念。我行般若。不行般若。亦行亦不行般若。

非行非不行般若。不爲布施。乃至不爲平等性故。修行般若。以不見諸法性差別故。如是與般若相應。則能安立無量有情於涅槃界。魔不得便。佛菩薩皆護念。諸天擁護。苦報轉輕。常不離佛。是菩薩不見諸法與空相應。亦不見空與諸法相應。是爲第一與空相應。普能引發十力等佛法。畢竟不起慳貪。犯戒等心。舍利子問。與般若相應菩薩。從何處來生。從此生何處。佛言。有從餘佛土來。有從觀史天來。有從人中來。從此間沒。生餘佛土。常得值佛。次廣分別無方便善巧。有方便善巧。種種差別之相。乃至淨五眼。發六通。不自高舉。於著不著。俱無所著。說此修行般若獲勝利時。三百苾芻。以衣奉佛。發無上心。佛授其記。一萬有情。各隨願力。生萬佛土。無等等品。第四。舍利子。大目連。善現。大飲光。滿慈子等。同讚菩薩般若。佛印成之。舌根相品。第五。世尊現舌根相。量等大千。百千俱胝那庾多衆。悟無生忍。佛授其記。薩皆來供養。諸天亦來供養。佛令供具。合成臺蓋。量等大千。百千俱胝那庾多衆。悟無生忍。佛授其記。善現品第六。佛告善現。汝以辯才。爲菩薩宣說般若。善現白佛。我都不見有一法。可名菩薩。可名般若。云何令我爲菩薩。宣說般若。佛言。菩薩唯有名。般若唯有名。如是二名。亦唯有名。不生不滅。唯假施設。不在內外兩間。不可得故。如世間我等色等。唯有假名。如是假名。不生不滅。唯假施設。謂唯我等。菩薩於一切法。名假。法假。方便假。應正修學。不應觀色名。若常無常。樂苦。我無我。淨不淨。空不空。有相無相。有願無願。寂靜不寂靜。遠離不遠離。雜染清淨。生滅。乃至意觸爲緣。所生諸受。名亦如是。若菩薩若菩薩名。若般若若般若名。皆不見在有爲界中。亦不見在無爲界中。於一切法。不作分別。能修布施等。能住內空等。善達實相。於名法假。如實覺已。不執著一切法。增益六度。趣入正性離生。見佛聞法。一切

陀羅尼門。三摩地門。皆得自在。復次即色等是菩薩不。離色等有菩薩不。善現一一答言。不也。佛言。善哉。若善提。若薩埵。若色等法。不可得故。菩薩及所行般若。亦不可得。菩薩應如是學。復次即色等真如是菩薩不。離色等真如有菩薩不。善現一一答言。不也。佛言。善哉。色等法。不可得故。色等真如亦不可得。菩薩及般若亦不可得。應如是學。復次色等增語。色等常無常等增語。是菩薩不。善現一一答言。不也。佛言。善哉。色等法及常常無等不可得故。增語亦不可得。菩薩及般若亦不可得。應如是學。復次諸法不見諸法。諸法不見法界。法界不見諸法。法界不見法界。有爲界不見無爲界。無爲界不見有爲界。非離有爲施設無爲。非離無爲施設有爲。菩薩於一切法都無所見。其心不驚恐怖沈沒憂悔。應如是教誡教授諸菩薩。令於般若皆得成辦。入離生品第七。善現白佛。菩薩欲圓滿六度。欲徧知一切法。欲斷一切惡修一切善。得一切佛法。滿一切有情心願等。當學般若。舍利子問。何名頂墮。善現答言。無方便善巧而行六度。住三脫門。退墮二乘地。是名頂墮。若不見空。依空觀空。如實知色等不應執。知心本性清淨。無變異。無分別。一切法亦無變異。無分別。能如是學。住不退地。則爲徧學三乘諸法。勝軍品第八。善現白佛。我於菩薩及般若。皆不知不得。云何令我以般若相應法。教菩薩。我於色等一切法。若增若減。不知不得。如何可言此是色等。是色等名。皆無所住。亦非不住。是色等義。無所有故。我於菩薩及般若。若義若名。不知不得。若以是法教諸菩薩。我常有悔。若菩薩聞如是說。心不沈沒憂悔。不驚恐怖。決定已住不退。以無所住方便而住。若無方便善巧。我我所執所纏擾故。心住色等。於色等作加行。不能攝受。修學圓滿般若。不能成辦一切智智。何以故。色等不應攝受。便非色等。本性空故。乃至其

所攝受。修學圓滿甚深般若。亦不應攝受。便非般若。本性空故。以本性空。觀一切法。心無行處。是名無所攝受。三摩地不共二乘。其所成辦一切智智。亦不應攝受。便非一切智。以內空故。乃至無性自性空故。非取相修得。諸取相皆是煩惱。若取相修得一切智智者。勝軍梵志於一切智智不應信解。彼生淨信。由勝解力。思察一切智智。不以相爲方便。亦不以非相爲方便。以相與非相俱不可取故。雖名隨信行。而能以本性空悟入一切智智。不取諸相。乃至涅槃。亦不取著。菩薩雖於一切皆無所取。而以本願所行未滿。所證未辦。終不涅槃。雖能圓滿所行。成辦所證。而不見四念住。乃至十八不共法。以四念住。即非四念住。乃至十八不共法。即非十八不共法。以一切法非法非非法故。是菩薩雖不取著一切法。而能成辦一切事業。行相品第九。善現白佛。菩薩無方便善巧。若行色等。是行其相。若行常無常等。是行其相。非行般若。又謂舍利子言。若於色等住想勝解。則作加行。不能解脫。尙不能證二乘。况證菩提。此名無方便善巧者。若不行色等。不行色等相。不行常無常等。不行常無常等相。有方便善巧故。能證菩提。是菩薩不取行。不取不行。不取亦行。亦不行。不取非行。非不行。於不取亦不取。由般若以無性爲自性故。是名無所取著。三摩地不共二乘。若菩薩於是勝三摩地。恆住不捨。速證菩提。復有健行三摩地等。略舉一百十五名。及餘無量無數三摩地門。陀羅尼門。若能恆善修學。亦令速證菩提。菩薩雖依一切法平等性。證入如是等持。而於平等性及諸等持。不作想解。以無所有中。分別想解無容起故。佛讚印云。菩薩應如是學於一切法。都無所學。舍利子問。若爾。諸法如何而有。佛言。諸法如無所有。如是而有。若於如是無所有法。不能了達。說名無明。由無明及愛勢力。分別執著斷常二邊。於諸法不知。

不見。不能出離三界。於三乘法不能成辦。若以無所得爲方便。速能成辦一切智智。幻喻品第十。善現白佛。設有問言。幻士能學般若等。能成辦一切智智不。當云何答。佛言。色等與幻有異不。答言。色等不異幻。幻不異色等。色等即是幻。幻即是色等。佛言。幻有染淨生滅不。答言。不也。佛言。無染淨生滅法。能學般若成辦一切智智不。答言。不也。佛言。於五蘊中起想等想。施設言說。假名菩薩不。答言。如是。佛言。假建立者。有生滅染淨不。答言。不也。佛言。無想無等想。無施設。無言說。無假名。無身身業。語語業。意業。無染淨生滅法。能學般若成辦一切智智不。答言。不也。佛言。菩薩以無所得而爲方便。修學如是甚深般若。速成一切智智。乃至若無方便善巧。不爲善友所攝受者。聞說是法。心驚恐怖。有方便善巧者。其心不驚恐怖。次更分別善友惡友之相。譬喻品第十一。佛答善現。無句義是菩薩句義。如空中鳥迹等。次釋善不善法等。次釋摩訶薩義。斷諸見品第十二。舍利子亦說摩訶薩義。以能說法。令斷諸見故。善現亦說摩訶薩義。發菩提心不取著故。六到彼岸品第十三。滿慈子亦說摩訶薩義。普爲利樂一切有情。修行六度。於一度皆修六度。令得圓滿。是名被大功德鎧故。乘大乘品第十四。舍利子問。云何菩薩乘於大乘。滿慈子答。以一切智智相應作意。大悲爲首。用無所得而爲方便。雖行六度等。而不得六度等。如實觀察一切。但有假名。施設言說。不可得故。無縛解品第十五。善現白佛。云何菩薩被大乘鎧。佛言。六度三十七品等。雖有所爲。而無其實。諸法性相。皆如幻故。善現言。不被功德鎧。當知是爲被大乘鎧。以一切法自相空故。佛言。一切智智無造無作。一切有情亦無造無作。菩薩爲此事故。被大乘鎧。由諸作者。不可得故。善現言。色等無縛無解。滿慈子問。何等色無縛無解。答言。如夢

如響等色。去來現在善不善無記等色。一切無縛無解。以一切法無所有故。遠離故。寂靜故。無生滅染淨故。三摩地品第十六。善現白佛。何等是大乘相。齊何當知發趣大乘。從何處出。至何處住。爲何所住。誰乘而出。佛言。六度是大乘相。二十空。百千三摩地。是大乘相。念住等品第十七。復次。四念住等三十七品。於中身念住觀最詳。三解脫門。十一智。三無漏根。三三摩地。十隨念。四靜慮等。十力。四無所畏。四無礙解。十八不共法。入諸字門。得二十種功德。是大乘相。修治地品第十八。答齊何當知發趣大乘之間。明初地修治十勝業等。出住品第十九。答從何處出。至何處住之間。謂從三界中出。至一切智智中住。然以無二爲方便故。無出無住。又答誰乘而出之間。都無乘是大乘出者。以若所若能。若時若處。皆不可得故。菩薩修行般若。雖觀諸法皆無所有。畢竟淨故。無乘大乘而出住者。然無所得而爲方便。乘於大乘。從生死中出。至一切智智中住。盡未來際。利樂有情。超勝品第二十。善現讚大乘超勝。佛廣明之。無所有品第二十一。廣明大乘與虛空等。普能容受。無來無去。無住可見。前中後際。皆不可得。三世平等。超出三世。故名大乘。菩薩修行般若時。住此三際平等性中。精勤修學。一切相智。無取著故。速得圓滿。隨順品第二十二。滿慈子問。如來令善現說般若。今何故說大乘。佛言。般若大乘二名。義無異故。無邊際品第二十三。善現明三際菩薩皆不可得。一切法無邊際故。菩薩亦無邊際。即一切法。離一切法。菩薩不可得。諸法畢竟不生。但有假名。都無自性。舍利子。一一重問。善現廣答。次白佛言。菩薩修行般若。觀察諸法無受無取。無住無著。亦不施設爲我。以不見一切法故。以一切法性空無生滅故。一切法不生不滅。即非一切法。以一切法與不生不滅。無二無處。不生不滅法。非一非

二。非多非別故。一切法入無二法數。遠離品第二十四。舍利子問。云何菩薩。云何般若。云何觀察諸法。善現對曰。勤求菩提。利樂有情。名菩薩。具如實覺。徧知一切法相。而無所執。名摩訶薩。有勝妙慧。遠有所離。遠有所到。名般若。觀一切法。非常無常等。名觀察諸法。次白佛言。菩薩見一切法無生。畢竟淨故。舍利子言。六趣應無差別。三乘不應得果。善現對曰。非勝義中有三乘六趣等。次明諸法不生。都無所依。次明應淨菩提道。有世出世二種六度。次明大功德聚。皆由般若所辦。般若為善法母。三乘從此生故。舍利子言。若菩薩住如是住。恆不捨離。成就大悲相應作意者。則一切有情。亦應成就菩薩。以一切有情。亦於此住。及此作意。常不捨離。則菩薩與有情。應無差別。善現報言。善哉。能如實知我所說意。雖似難我。而成我意。何以故。有情非有故。無實故。無性故。遠離故。寂靜故。無覺知故。當知如是住及作意。亦非有。乃至無覺知。歷一切法。廣說亦爾。由此因緣。菩薩於如是住。及此作意。常不捨離。與諸有情。亦無差別。以一切法無差別故。佛讚印之。大千震動。佛笑顯益。帝釋品第二十五。諸天來集。佛光赫奕。帝釋重問。何謂般若。云何應住。應學。善現先勸諸天發心。次示以無所得而為方便。思惟世間法皆無常苦等。佛讚印之。善現自言。為報恩故。又為帝釋說如所應住。不應住相。舍利子念言。若一切法不應住。云何應住般若。善現謂言。同諸如來。於一切法都無所住。亦非不住。以色等法。無二相故。天子作念。呪句猶可。了知般若。竟不能解。善現告言。我曾不說一字。汝亦不聞。當何所解。如化如夢。谷響幻事。說聽及解。都不可得。天子復念轉深轉妙。善現告言。色等非深非妙。色等自性非深非妙。天子復念。善現所說。不施設色等。善現告言。從初發心。應住無說。無聽。無解。甚深般若。信受品第二十六。天子作

念。善現欲爲何等有情。樂說何法。善現告言。欲爲如幻化夢有情。樂說如幻化夢之法。諸聲聞及菩薩同問。誰能信受。阿難答以有能信受。善現告諸天子。其中實無能信受者。舍利子問。豈不於中說三乘法。乃至令得最勝妙辯。善現答言。誠如所說。此般若中。以無所得而爲方便。說三乘法等。由內空等故。散華品第二十七。諸天化華散供。佛令合成華臺。善現念爲從心化出。帝釋言。但變現耳。善現言。旣非生法。則不名華。乃至一切法亦如是。佛答帝釋。善現不違色等假名。而說法性。善現謂言。菩薩知一切法。但假名已。應學般若。不於色等學。不見色等。可於中學故。舍利子問。何故不爲攝受色等。亦不爲壞滅色等故。善現對曰。不見有色等。可攝受。可壞滅。亦不見有能攝受及壞滅者。若能若所。內外空故。以無所學。無所成辦。爲方便。故而學般若。則能成辦一切智智。次明諸法皆無依持。隨順世俗。說依佛力。次答菩薩所學般若。不應於色等求。不應離色等求。帝釋歎般若大。無量無邊。善現印之。授記品第二十八。天仙三返唱善。佛述見然燈佛得授記事。預命帝釋。勤加守護。攝受品第二十九。佛爲帝釋說現法當來功德勝利。聲堵波品第三十。佛明修般若者。能降自他貪等刀仗。是大明呪等。書經功德。勝於供設利羅。福生品第三十一。佛印帝釋歎經功德。功德品第三十二。諸天及佛。皆勸帝釋受持般若。外道品第三十三。外道來求佛過。帝釋念般若退之。魔軍亦爾。天來品第三十四。慶喜白佛。何緣但讚般若。佛言。般若爲尊。爲導。故帝釋更說功德。佛又廣說功德。并明諸天龍神來禮般若之相。是故經典隨所在處。應周而除穢。掃拭塗治。香水散灑。寶座安措。香華珍寶莊嚴供養。設利羅品第三十五。帝釋答佛。於設利羅寧取般若。以諸佛身。皆因般若生故。經文品第三十六。佛爲

帝釋展轉較顯書經功德。帝釋白佛。應以種種巧妙文義。爲他演說。佛又較顯功德。并明說相似法。真正法不同之義。隨喜回向品第三十七。慈氏菩薩。與善現酬唱隨喜迴向之法。諸天讚美。大師品第三十八。舍利子向佛廣讚般若。佛言。般若即是大師。善現亦歎般若。是大波羅密多。地獄品第三十九。舍利子問。能信解者。從何處來。乃至修習。爲已久如。佛言。從十方法會來。乃至信解甚久。又爲善現分別修學久近之相。并說誘般若者。墮三塗相。清淨品第四十。佛與舍利子明一切法。畢竟淨故。是法清淨。最爲甚深。善現答帝釋問。所起執著。佛又爲說微細執著。無標幟品第四十一。善現問。云何應行般若。佛言。不行色等等。若常若無常等。善現白佛。菩薩如爲虛空。擐功德鎧。會中有一苾芻。作念。般若微妙難測。雖非有法。而非無。佛讚印之。善現答天帝釋。若欲守護修般若者。不異守護虛空幻夢化等。諸天以佛神力。見十方各有千佛。同說般若。佛告善現。慈氏證菩提時。亦於此處宣說般若。乃至諸天慶慰。唱言。今見第二轉妙法輪。佛告善現。如是法輪。非第一轉。亦非第二。於一切法。不爲轉故。還故。出現世間。但以無性自性空故。標幟名言。皆不可得。是故名大波羅密多。不可得品第四十二。善現廣歎。佛爲釋成。東北方品第四十三。帝釋念聞經善根。舍利子讚信解功德。佛答帝釋云。何住習之間。又印舍利子甚深等讚。舍利子又說。王都前相。等喻。佛讚印之。又印善現甚深等讚。次爲舍利子說此經。從東南方。乃至最後。於東北方興盛。魔事品第四十四。佛爲善現說修行時。畱難魔事。不和合品第四十五。次說學法與持法者。種種兩不和合。皆爲魔事。及說惡魔所化作事。佛母品第四十六。佛告善現。佛觀般若。如子護母。示相品第四十七。諸天問。般若以何爲相。佛言。以空無相無。

顯等爲相。依世俗說。不依勝義。當知般若遠離衆相。不應問言以何爲相。乃至一切法相。如來如實覺爲無相。般若不見色等故。名示色等相。能爲如來顯色等世間空。示色等世間遠離寂靜等。由是能示世間實相。名如來母。能生如來。又色等皆不可思議。不可稱量。無數量。無等等。以不可得故。於是四衆得益。菩薩得記。成辦品第四十八。佛答善現。般若能辦六度十八空等。信解般若菩薩。從人中來。或從他方佛處來。或從觀史多天來。船等喻品第四十九。佛爲善現說海船破喻。不取所依。則溺死。能取所依。則至岸。菩薩亦爾。不依般若。則退入二乘。能依般若。則定證菩提。及說度曠野等諸喻。初業品第五十。佛答善現。初業菩薩。應親近眞淨善友。調伏貪等品第五十一。善現白佛。誰於般若。能生淨信勝解。若生信解心。何性何相。何狀何貌。佛言。心調伏貪瞋癡等。爲性相狀貌。眞如品第五十二。諸天散華禮讚。佛印述之。又讚善現隨如來生。善現答之。大千震動。天又散華。善現復說眞如相義。衆生獲益。六千菩薩。成阿羅漢。佛告舍利子。此由不攝受般若。遠離方便善巧。如大鳥無翅故。次諸天謂善提極難信解證得。善現謂極易信解證得。舍利子謂若易信解證得。不應有退屈者。善現問。色等有退屈。不色等眞如有退屈。不離色等及色等眞如有法有退屈。不舍利子一一答言。不也。然佛何故說三種乘。滿慈子。令問。爲許有一菩薩乘。不。善現以眞如義反徵辯竟。結云。若菩薩聞說諸法。眞如不可得。相心不驚恐怖等。速證菩提。定無退屈。佛讚印之。善現請問。菩薩欲疾成辦菩提。當於何住。應云何住。佛廣答之。二千菩薩得無生忍。不退轉品第五十三。佛爲善現說不退轉菩薩諸行狀相。乃至常得身語意淨。魔不能惑。轉不轉品第五十四。佛答善現。不退轉菩薩。旣名不退轉。亦得名退轉。於

色等想有退轉故。復次不退轉菩薩。當作上士。不作下士。常不遠離念。做作意。聞法作意。生生之處。常不離佛。恆聞正法。甚深義品第五十五。善現白佛。惟願復為菩薩說甚深義。令住其中。能修施等。令速圓滿。佛言。種種增語。皆顯涅槃。為甚深義。乃至色等亦名甚深。色等真如甚深。故色等真如非即色等。非離色等。是故甚深。次較顯如教住。如說學之功德。又較顯隨喜迴向功德。又答無數無量無邊之義。又明依止無增減。無所有為方便。修行般若。由此為門。集諸功德。便證菩提。如焰燦炷。非初非後。不離初後。夢行品第五十六。舍利子問。夢中行此三摩地。於深般若。若有增益。不善現答言。晝行有增益者。夢行亦有增益。次與彌勒菩薩問答。願行品第五十七。佛告善現。菩薩修行施等。為諸有情發大願行。殑伽天品第五十八。授天女記。習近品第五十九。佛答善現。觀色等空。不令心亂。則不見法。不作證。未入定位。繫心於所緣。已入定時。不繫心於境。不退施等。不證漏盡。如壯士過曠野。如堅翅翔虛空等。增上慢品第六十。佛為善現說菩薩不退轉相。及說增上慢相。次明菩薩欲證菩提。應當親近真善知識。次說般若妙相。次較說經功德。同學品第六十一。帝釋歎持說者。非少善根所能。佛為較顯勝德。帝釋復為一苾芻廣明勝德。兼為慶喜明仗佛力。佛又為慶喜分別有惱亂不惱亂之所由。次明菩薩與菩薩共住。相視應如大師。同性品第六十二。佛答善現。內空等是菩薩同性。住此中學。名為同學。又問。若一切法本性清淨。菩薩云何復於妙法而得清淨。佛言。於性淨中。精勤修學。甚深般若。如實通達。遠離煩惱。染著。故說復得清淨。復次方便善巧威德力故。攝持增長。導引一切波羅密多。如薩迦耶見。如命根。無分別品第六十三。帝釋散華發願。問隨喜福。佛為較顯。善現問如幻心。云

何能證菩提。佛爲徵釋。并歎菩薩能爲難事。善現復言。不應說彼能爲難事。以所證能證。證法證者。證處證時。都不可得。如幻如影。乃至如化。如機關等。無分別故。舍利子言。若一切法皆無分別。云何分別。五趣三乘。善現答言。有情顛倒惑業因緣。施設五趣差別。無分別故。施設三乘聖者。三世如來。皆由分別斷故。可施設有種種差別。菩薩應行無所分別。甚深般若。便能證得無所分別微妙菩提。覺一切法無分別性。盡未來際。利樂有情。堅非堅品第六十四。善現答舍利子。菩薩修行般若。行非堅法。不行堅法。又爲諸天明希有事。如欲調伏虛空。當知色等離故。即施等離。又答佛不沈不沒之問。次問何等菩薩。爲佛讚歎。佛言。住不退轉位者。又隨不動佛爲菩薩時。所行而學者。又隨寶幢頂髻二菩薩。所行而學者。實語品第六十五。佛爲帝釋歎善現住於勝住。然猶不及菩薩所住甚深行住。六百苾芻發菩提願。佛授其記。次以般若付囑慶喜。并現不動佛國。令大衆見。又出舌相。再囑慶喜。無盡品第六十六。佛答善現。般若菩提。皆如虛空。不可盡故。應觀色等無盡故。引發般若。乃至魔皆愁苦。相攝品第六十七。佛答善現。六度互相攝取之相。巧便品第六十八。佛答善現。菩薩成就巧方便者。發心甚久。乃至善根甚多。又般若雖於五度最爲前導。而無分別作用。真實自體。菩薩爲有情故。勤行六度。前五攝在般若。性無差別。爲度有情。假說差別。又般若於一切法。都無所捨。若不思惟色等。便能增長善根。圓滿六度。證得菩提。乃至著無所有不可取法。則離般若。般若如轉輪王。一切善法。隨行隨至。又能示現道非道相。又如寶觀色等非相應。非不相應。是能與六度常共相應。不相捨離。又般若是諸善法所趣向門。如水趣海。又應於諸法如實了知略廣之相。又應觀色等彫落故。破壞故。乃至性虛僞故。行

深般若。如引虛空。引深般若。破壞諸法。修深般若。從初發心。至菩提座。應行。應引。應修。無容橫起諸餘作意。又應學一切法。皆不可施設。而越菩提。都無所行。是行般若。從初發心。常學無所得。而為方便。應修布施等。應住內空等。諸有二者。名有所得。諸無二者。名無所得。雖於諸法。常樂決擇。而不得色等。以無為無作。而為方便。行深般若。佛以淨五眼。求色等不可得。雖證一切智智。不住有為界。亦不住無為界。如變化者。度化有情。如來與變化佛。俱為真淨福田。諸法。法性為定量故。又一切法。但有名相。唯假施設。名相性空。有情執著。沈淪生死。菩薩悲愍。發心行行。證得一切智智。拔濟令出。然諸名相。無生無滅。亦無住異。施設可得。又前際後際。俱不可得。達一切法。自相空已。應行般若。無所執著。次釋般若。不與諸法為義。非義。樹喻品第六十九。善現以空中種樹。喻菩薩能為難事。佛以良田種樹之喻。答之。次釋菩薩。當知如佛。并較發心不退。乃至如來功德。展轉增勝。又答初發心菩薩。恆正思惟。一切智智。信解一切法。皆無性為性。菩薩行品第七十。佛答善現。當於色等空。行菩薩行。不以二故。攝受修行。六度。乃至證得一切智智。恆時增長一切善法。親近品第七十一。佛答善現。若不親近諸佛。圓滿善根。承事善友。尚不名菩薩。豈能證一切智智。徧學品七十二。佛答善現。菩薩成就最勝覺慧。雖能受行清淨深法。而不攝受殊勝果報。於法自性。能不動故。次明離四句。而有得有現觀。以一切法。常無常等為戲論。應離諸戲論。行深般若。徧學諸道。由菩薩道。得入正性離生。於聖法毗柰耶中。應如是學。甚深般若。修除遣一切法。若一切有二想者。定無布施等。下至順忍。彼尚非有。况能徧知一切法。况能得一切智智。漸次品第七十三。佛答善現。住無想者。亦無順忍。菩薩於一切法。皆無有想。亦無無想。

以無性爲聖道。以無性爲現觀。若一切法有少自性。或復他性爲自性者。佛不應通達一切法無性爲性。已入四禪。起五通。證菩提。度有情。菩薩初發心位。聞一切法。及諸有情。皆以無性爲性。證得此故。說名爲佛。乃至預流。深信此故。名賢善士。故我定應發趣菩提。普爲有情。得涅槃故。作漸次業。修漸次學。行漸次行。所謂六度。六念。乃至一切相智。無相品第七十四。佛答善現。以一切法。皆以無性爲性。諸有情類。具斷常見。住有所得。難可解脫。若無所得。即是得。即是現觀。即是菩提。以不壞法界相故。由此故。得有初地。乃至十地。得有異熟神通六度等法。由離諸相。無漏心力。能於無相無作法中。圓滿一切功德。無雜品第七十五。佛答善現。安住如夢等五取蘊中。爲諸有情。布施持戒安忍。精進。修定。學慧。如實了知。如夢等五蘊。皆同一相。所謂無相。若如是知。而行施等。則能圓滿一切善法。衆德相品第七十六。佛答善現。愚夫異生。於夢得夢。得見夢者。乃至於化。得化。得見化者。顛倒執著。造三業行。往來生死。菩薩以二種空。觀察諸法。一畢竟空。二無際空。安住二空。爲說正法。色等是空。離我所。如夢。如化。都無自性。又以方便神力。拔濟令出。得三乘果。次明菩薩甚奇希有之法。安住異熟六度五通等。隨應攝受有情。布施愛語。利行。同事。財施。法施。說三十七品。乃至相好等法。四十二字母等。不壞諸法。無二分。別。爲諸有情。如實宣說。令離妄想。顛倒執著。趣三乘果。譬如化佛。教所化衆。又一切法。不異眞法界等。而依世俗。施設因果差別。菩薩於諸法中。自無執著。教他無執。善達諸法。如實相故。善達品第七十七。佛答善現。如所變化。於一切法。都無所行。是爲善達諸法實相。以諸法。但有假立名相。是故菩薩於諸善法。能自增進。亦能令他增進。又如實知色等相。色等生滅。色等眞如。是爲能學三解脫門。則

能學一切法。又欲學法界。當於一切法學。知一切法。即真法界。初中後際。常無差別。實際品第七十八。佛答善現。菩薩但以實際爲量。行深般若。由方便善巧力故。安立有情。令住施等。而不執著。觀本性空。都無所得。爲度執有情想及法想故。行道相智。得三乘道。趣證無上菩提。佛眼常無斷壞。無闕品第七十九。佛答善現。菩薩具足殊勝方便善巧。差行施等。不得施等。亦不遠離施等。修菩提道。次答舍利子。不離合一切法。不離散一切法。諸法皆無自性。可合離故。如實了知一切法性。皆不可取。於一切法。得無障礙。安住二諦。宣說正法。如化食施化衆等。又答善現。修行施等。及餘大菩提道。皆能成熟有情。道士品第八十。佛告善現。總一切法。皆菩薩道。不學一切法。定不能得一切智智。審察諸法。皆畢竟空。不應執著。而於諸法。學無厭倦。觀諸有情。心行差別。如實了知。但行虛妄所執。方便善巧。教令遠離所執。修諸善行。然勿恃此。而生憍逸。次明清淨。自他三種。羸重。能淨佛土。正定品第八十一。佛答善現。是菩薩從初發心。至最後有。皆住菩薩正性定聚。次釋如來本生之疑。次明一切善法。皆是菩提資糧。佛法品第八十二。佛答善現。即菩薩法。亦是佛法。由位有異。法性非異。無事品第八十三。佛答善現。無性法中。無業無果。亦無作用。愚夫不了。顛倒發業。受三界身。爲拔濟故。施設聖法。及毗奈耶分位差別。廣說夢像響。燄影幻變化。尋香城喻。實說品第八十四。佛答善現。我說一切法平等性。爲清淨法。菩薩知一切法不可取。已爲饒益彼諸有情故。求趣菩提。不爲己身。非爲餘事。乃至依世俗故。說得菩提。若執有二。不能得果。亦無現觀。執無二者。亦復如是。法平等性。非佛所行。以與佛無別故。又復法平等性。非即一切。非離一切。說名勝義。菩薩行深般若。不動勝義。而行菩薩行。成熟有情。嚴淨佛

土證得菩提。說法度衆。空性品第八十五。佛答善現。若有情自知諸法皆本性空。則佛菩薩不現神通。作希有事。又一切世出世法。無非是化。然有聲聞化。有獨覺化。有菩薩化。有如來化。有煩惱化。有諸業化。乃至非實有法。名爲涅槃。是故可說涅槃非化。又一切法。先既非有。後亦非無。自性常空。不應驚怖。已上共七十八卷。與初分品有開合。文略義同。但無常啼法涌二品。

卷第二十三

大乘經藏 般若部第二之八

○第三分。緣起品第一。佛住鷲峰。與五億苾芻等俱。餘並同初二分。而九方文略。舍利子品第二。與初分學現品。至現舌相品同。而文較第二分又稍略。善現品第三。與初分教誡教授品。至淨道品同。天帝品第四。與初分天帝品。至歎衆德品同。現宰堵波品第五。與初分攝受品同。稱揚功德品第六。佛設利羅品第七。福聚品第八。隨喜迴向品第九。地獄品第十。歎淨品第十一。讚德品第十二。陀羅尼品第十三。魔事品第十四。現世間品第十五。與初分佛母品同。不思議等品第十六。譬喻品第十七。與初分辦事品等同。善友品第十八。眞如品第十九。不退相品第二十。空相品第二十一。殑伽天品第二十二。巧便品第二十三。學時品第二十四。見不動品第二十五。即初分願喻品等。方便善巧品第二十六。即初分無盡品等。慧到彼岸品第二十七。

妙相品第二十八 施等品第二十九 佛國品第三十 宣化品第三十一 共五十九卷。與第二分。開合不同。亦無常啼法涌二品。

○第四分。妙行品第一。即善現教誠品等。帝釋品第二 供養窣堵波品第三 稱揚功德品第四

福門品第五 隨喜迴向品第六 地獄品第七 清淨品第八 讚歎品第九 總持品第十 魔

事品第十一 現世間品第十二 不思議等品第十三 譬喻品第十四 天讚品第十五 真如

品第十六 不退相品第十七 空相品第十八 深功德品第十九 談夢覺義較前三分更明暢。

菟伽天品第二十 覺魔事品第二十一 善友品第二十二 天主品第二十三 無雜無異品第

二十四 迅速品第二十五 幻喻品第二十六 堅固品第二十七 散華品第二十八 隨順品

第二十九 共一十八卷。隨順品中文與初二三分不同。

○第五分。善現品第一 天帝品第二 窣堵波品第三 神呪品第四 設利羅品第五 經典品第

六 迴向品第七 地獄品第八 清淨品第九 不思議品第十 魔事品第十一 真如品第十

二 甚深品第十三 船等喻品第十四 如來品第十五 不退品第十六 貪行品第十七 姊

妹品第十八 夢行品第十九 勝意樂品第二十 修學品第二十一 根栽品第二十二 付囑

品第二十三 見不動佛品第二十四 共十卷。較第四分更略。

○第六分。緣起品第一。佛住鷲峰。與四萬二千苾芻。七萬二千菩薩。及天龍鬼神衆俱。面門出光。照無邊

界。還歸面門。東方普光佛所。離障菩薩。南方日光佛所。日藏菩薩。西方功德光明佛所。功德藏菩薩。北

方自在王佛所。廣聞菩薩。東南方甘露王佛所。不退轉菩薩。西南方智炬佛所。大慧菩薩。西北方妙音王佛所。功德聚菩薩。東北方智上佛所。常喜菩薩。上方金剛相佛所。寶幢菩薩。下方金剛寶莊嚴王佛所。寶信菩薩。皆來集會。通達品第二。最勝天王請問。云何菩薩修學一法。能通達一切法。佛答以修學般若。能通達十波羅密。顯相品第三。佛答最勝。如地水火風空等相。甚深般若。亦復如是。法界品第四。佛答最勝。菩薩學深般若。有妙慧故。通達法界。即是不虛妄性。不變異性。諸法真如。但可智知。非言能說。於是大千變動。菩薩脫衣敷座。諸天散華奏樂。龍澍香雨。十方佛放眉光。徧照此土。還歸佛頂。衆會獲益。最勝復問。甚深般若。既絕語言。離諸文字。云何菩薩爲諸有情說法。隨順甚深法相。不違世俗。佛言。具大方便善巧力故。謂大慈悲喜捨。又問。云何爲度有情。示現諸相。佛言。相不可得。但由方便善巧威力。示現入胎。乃至涅槃種種化相。念住品第五。佛答最勝。菩薩行深般若。心正無亂。善修身受心法念住。及說如來功德大神相。法性品第六。佛答最勝。如來法性。不可思議。如無價珠。墮在淤泥。不爲所染。依此法性。修習善根。具足方便。大悲願力。不捨有情。遠離一切虛妄分別。心得清淨。深如大海。一一行中。具衆行故。生淨佛土。不爲胎汗。於是舊住天神。空中讚歎。并爲光德天子。現淨土相。平等品第七。佛答最勝。法性平等之義。并爲授記。現相品第八。舍利子問。先現苦行等事。最勝答之。無所得品第九。善思菩薩問。最勝得受記耶。答言。我雖受記。而猶夢等。乃至重重問答。令衆獲益。最勝問佛。云何未發心者。即能發心。皆悉成就。得不退轉。佛言。以純淨意。發菩提心。親近賢聖。樂聞正法。遠離慳嫉。正信業果。設爲身命。終不作惡。乃至佛爲破四見故。說無常苦無我涅槃寂靜四法。次

說神呪。證勸品第十。佛爲最勝說過去功德寶王佛時。治世輪王。問深正法。成然燈佛。彼時千子。即是賢劫千佛。最勝又問。云何修行。速成大道。佛言。一切善法。無不修滿。又問。現何色像。佛言。如鏡隨現。又般若猶如虛空。無有一法。可爲譬喻。顯功德品第十一。佛答曼殊室利。過去多聞佛時。精進力菩薩。即今最勝天王。又答云。何護持正法。云何能調伏心等問。現化品第十二。最勝答善思問。佛所化身。更能化作無量。化佛。往昔願力清淨。故及答護正法問。又有賢德天子。相與問答。陀羅尼品第十三。曼殊室利及寂靜慧菩薩。共說衆法。不入陀羅尼功德。大千振動。天雨妙華。佛說過去寶月佛時。寶功德菩薩。有大辯才。即今寂靜慧是。勸誡品第十四。佛答曼殊室利。具明信受。福聚。毀謗罪過。二行品第十五。佛爲曼殊室利說化他自行二種般若。及說五事不可思議。三十二相八十隨好。讚歎品第十六。曼殊室利。妙色天子。善名天子。大梵天王。各以頌讚。佛印成之。付囑品第十七。佛以十法。付囑阿難。一書寫。二供養。三施他。四諦聽。五披讀。六受持。七廣說。八諷誦。九思惟。十修習。及爲持髮梵天。說佛讚三事。最爲無上。一發菩提心。二護持正法。三如教修行。八卷。

◎第七曼殊室利分。佛在給孤獨園。與百千苾芻。十千菩薩衆俱。曼殊室利明相現時。詣如來所。在外而立。舍利子等亦然。佛出敷坐。跏趺。曼殊答佛。爲欲利樂有情。以真如相觀於如來。次與舍利子互相酬唱。復答佛發明甚深般若。觀一切法。皆是佛法。於是舍利子。慈氏菩薩。曼殊室利。無緣慮女。皆歎聞說。不沈沒驚怖者。已住不退轉地。佛印成之。又與舍利子互相問答。顯眞法界性平等義。又與佛互相問答。明福田相不可思議。大地變動。衆會得益。次明初學不思議定。如初學射。久習成就。不復作意。大迦

葉問當來誰能信解修學。佛具答之。次爲曼殊說一相莊嚴三摩地。謂不動法界。念一如來。卽爲普觀三世諸佛。乃至佛現神力。護持般若。若久住世間。饒益有情。二卷。與大寶積經第四十六會同。

○第八那伽室利分。佛在給孤獨園。妙吉祥菩薩於日初分。著衣持鉢。漸將入城。龍吉祥菩薩見已。問答無能勝。菩薩來讚妙吉祥菩薩。答以一切非實。皆如谷響。龍吉祥復相問答。旣承教誡。入海喻定。善思菩薩變動大千。不能令出。後從定起。雨諸香花。向佛歸命。妙吉祥又爲說無上法食。善現來問。何所談論。妙吉祥詰以何法名爲大士。如響。豈能有所談論。善現入無所得三摩地門。出定。向佛皈命。妙吉祥又說諸法如幻夢等。善現又入滅定。舍利子來問答。善現出定。妙吉祥爲說希有妙食。善現及舍利子俱入滅定。次從定起。各各入城。善現化一女人。妙吉祥與諸菩薩聲聞等衆。各飯食已。俱詣佛所。以上事。具白世尊。佛讚印之。妙吉祥曰。彼女所斷我見。卽非我見。是故如來說名我見。乃至夫法想者。卽非法想。是故如來說名法想。次歎持四句頌。福聚甚多。世尊說頌。如星翳燈。幻露泡夢電雲。於一切有爲。應作如是觀。一卷。

○第九能斷金剛分。與流通金剛般若同本。頌曰。諸和合所爲。如星翳燈。幻露泡夢電雲。應作如是觀。一卷。

○第十般若理趣分。佛住他化自在天王宮。與八百萬大菩薩俱。爲諸菩薩說一切德甚深微妙般若理趣清淨法門。此門卽是菩薩句義。理極妙樂清淨句義。諸見永寂清淨句義。乃至一切有記無記法。有漏無漏法。有爲無爲法。世間出世間法。空寂清淨句義。是菩薩句義。復依徧照如來之相。說寂靜法性。

般若理趣現等覺門。復依調伏一切惡法釋迦牟尼如來之相。說調伏衆惡般若理趣普勝法。復依性靜如來之相。說平等智印般若理趣清淨法。復依一切三界勝主如來之相。說灌頂法門般若理趣智藏法。復依一切如來智印持一切佛祕密法門如來之相。說如來智印般若理趣金剛法。復依一切無戲論法如來之相。說離戲論般若理趣輪字法。復依一切如來輪攝如來之相。說入廣大輪般若理趣平等性。復依一切廣受供養眞淨器田如來之相。說眞淨供養甚深理趣無上法。復依一切能善調伏如來之相。說能善調伏甚深理趣智藏法。復依一切能善建立性平等法如來之相。說性平等性甚深理趣最勝法。復依一切住持藏法如來之相。說有情住持甚深理趣勝藏法。復依究竟無邊際如來之相。說無邊無際究竟理趣金剛法。復依徧照如來之相。說三神呪。一一告金剛手受持功德。一卷與密部實相般若同。而呪不同。

◎第十一布施波羅密多分。佛在給孤獨園。與千二百苾芻俱。再三命勸舍利子。爲諸菩薩宣說布施波羅密多。舍利子言。應緣一切智智。以大悲爲上首。修行布施。則能攝受一切智智。疾證無上菩提。寧以無記心行施。或不行施。終不以迴向二乘地心行施。次答滿慈子問。喻說菩薩聲聞行施勝劣意願。滿慈子亦說二施譬喻。舍利子廣說有巧方便所行布施。及隨喜迴向所引善根。如月。如日。如吠瑠璃寶。如馬寶。又常於有情。作大饒益。如眞金。如日月。如商主。如善士。如王種。次更廣說。應起決定施心。應學無染布施。又觀諸法。若順若違。皆能助引一切智智。又明二乘於一切智。亦有助。然諸二乘作意。於一切智。及此寶糧。俱無助力。故制菩薩定不應起二乘相應作意。次明能捨衆相。迴向善提。欲爲有情。

作大饒益。乃名能得無上善利。方便善巧。不取法相。得入居頂諸菩薩數。次明說如是法。皆如來力。佛囑阿難受持。滿慈子問。若一切法。皆非實有。行布施。何所捨。成正覺。何所得。佛言。無所捨。無所得。無所損。無所益。如二幻師。戲爲變易。以幻價直。易化美團等。又舍利子。答滿慈子。菩薩先應思惟一切法性。畢竟空寂。次應思惟一切智智。具勝功德。後應愍念一切有情。貧乏珍財。受諸苦惱。作是念已。便捨一切珍財。施諸有情。心無所著。亦以正法。施諸有情。亦以無邊上妙供具。恭敬供養佛法僧寶。如是布施。隨順菩提。疾能證得一切智智。與諸有情。作大饒益。於是佛以神力。令諸大衆見十方各無數。殑伽沙數世界。各有無量菩薩。行施精勤。乃結勸云。菩薩欲疾證得一切智智。窮未來際。利樂有情。應觀法空。緣一切智。具勝功德。愍念有情。受貧匱苦。應行布施。波羅密多。持此善根。普施一切。令脫惡趣。生死衆苦。作是願言。十方世界。諸有情類。由我善根功德威力。未發無上心者。令速發心。已發心者。令永不退。已不退者。令速圓滿一切智智。舍利子問。最初發心。第二發心。住不退地。坐菩提座。差別。佛答示之。并以神力。令見十方各無數界。無數菩薩。行菩薩行。種種差別。無數如來。種種方便。饒益有情。乃結勸云。若定發心。求一切智。彼必當作世間第一真淨福田。及作大千最大法師。亦作如來。利樂一切有情。次答舍利子問。廣明菩薩初心。勝於二乘後心。及明菩薩不退心力。於餘神力。最爲無上。次滿慈子與舍利子互相問答。明退心者。非真菩薩。是增上慢。欲證菩提。應正發起一切智智相應作意。乃至佛囑

阿難受持。五卷。

◎第十二淨戒波羅密多分。佛在給孤獨園。與千二百五十苾芻俱。命舍利子。宣說戒度。滿慈子問。云何

應知菩薩持戒犯戒。舍利子答。若住二乘作意。是名非所行處。是名菩薩犯戒。又問。若求一切智智而修布施。豈不執著一切智智。成戒禁取。云何名爲持菩薩戒。答言。一切智智。遠離衆相。非方處攝。既非有法。亦非無法。由此因緣。不可執取。是故菩薩行施持戒。迴向善提。雖求證得一切智智。而不名爲戒禁取攝。若迴向二乘地。執取淨戒。是失菩薩戒。名犯戒菩薩。若未見聖諦。未證實際。或有因緣。易可還淨。若見聖諦。證實際已。異見深重。難可還淨。又雖經沙數大劫修行淨戒。令滿而不迴向善提。饒益有情。不能攝受菩薩戒度。雖經沙數大劫居家受妙五欲。而不發趣二乘地心。求一切智。增上意樂。無退壞故。不名犯菩薩戒。又若見有少法名爲作者。名爲犯戒菩薩。若隨所修六度。皆用大悲爲首。發起隨順迴向一切智智相應之心。是名具戒菩薩。次廣歎初心一菩薩戒。遠勝世出世間一切淨戒。以其心無分限。普度有情。求大菩提。引發淨戒。是故除佛所有淨戒。於餘淨戒。最爲第一。又寧遲證菩提。不爲速求墮二乘地。又菩薩不應欲勝菩薩。不應輕慢菩薩。不應降伏菩薩。於餘菩薩。供養恭敬。應如如來。乃至應普恭敬一切有情。又一切法。無少有實。皆如幻事。故諸菩薩迴向。起求一切智智。皆由了達諸法非實。如幻。如化。有所堪能。又菩薩於六度二十空等。乃至一切相智。雖應精勇修習。如救頭然。不應味著。又明菩薩於二乘地。但應遠離。不應讚毀。佛讚印之。并爲廣說方便善巧。又明如來皆深愍念一切有情。心無差別。不隨欲行。然於菩薩。最不棄捨。五卷

◎第十三安忍波羅密多分。佛在給孤獨園。與千二百五十苾芻衆俱。命滿慈子宣說忍度。舍利子問。菩薩忍聲聞忍。有何差別。滿慈子答。聲聞唯爲捨棄自身煩惱。名爲少分安忍。菩薩欲度無量有情。名爲

具分安忍。於檀塗火燒。起平等心。俱欲畢竟利樂。又聲聞唯觀蘊等。無我有情之所引發。菩薩亦觀蘊等。無性無生之所引發。菩薩欲證菩提。應修其心。令與地水火風空等。寧受無邊大苦。而不愛著二乘。自利衆善。又若住二乘地。起二乘作意。乃至樂觀蘊等。常無常等。是爲行他行處。若修六度一切智智。相應作意。是爲行自行處。一切惡魔。不能得便。一卷。

◎第十四精進波羅密多分。佛在給孤獨園。與千二百五十苾芻衆俱。滿慈子問菩薩精進。佛言。初發心時。若身若心。先應爲他作饒益事。如僕任主。不應自在。諸有所爲。皆隨主欲。亦如馬寶。盤迴去住。遲速任人。又常勤修六度二十空等。能爲難事。一卷。

◎第十五靜慮波羅密多分。佛住鷲峰。與千二百五十苾芻衆俱。舍利子問。菩薩云何方便。安住靜慮。佛言。漸次入四靜慮。引發五通。降魔成覺。又雖現入四禪四定。而不味著。亦不離染。雖觀一切法。都不可得。而不棄捨一切智智。滿慈子問。何緣如來許諸菩薩入四禪四定。不許久住其中。心生染著。舍利子答。若生欲界。速能圓滿一切智智。生色無色。無斯用故。滿慈子問。云何安住靜慮。攝受般若精進。忍戒施等。佛一一答。又明若住二乘相應作意。名爲散亂。若隨所集一切善根。迴向趣求一切智智。名爲心定。舍利子問。菩薩安住靜慮。云何方便。還從定起。佛言。於色無色靜慮等。至順逆次第。超越串習。極善純熟。遊戲自在。復入欲界。非等引心。由起此心。還生欲界。親近供養諸佛。引發菩提分法。生色無色。無如是能。上二界生。身心鈍故。二卷。

◎第十六般若波羅密多分。佛住竹林白鷲池側。與千二百五十苾芻。無量無數。一生所繫菩薩衆俱。有

善勇猛菩薩。請問何謂般若。云何修行。云何令速圓滿。云何惡魔不能得便。能覺魔事。云何安住。速能圓滿一切智法。佛言。實無少法。可名般若。謂如實知一切法性。無實無主。亦無虛妄。雖不見有菩提心性。而能發起大菩提心。彼雖如是發菩提心。而於菩提無所引發。若能遠達諸法實性。是謂般若微妙甚深。實不可說。今隨世俗文句。方便演說。即蘊等非般若。離蘊等非般若。般若於一切法。都無所依。不在蘊等內。不在蘊等外。不在兩間。遠離而住。與蘊等非相應。非不相應。蘊等真如。不虛妄性。不變異性。如所有性。是謂般若。復次一切法無自性。是謂般若。一切法非一切法所行故。無知無見。是謂般若。一切法不捨自性。如是徧知。是謂般若。一切法與一切法非合非離。是謂般若。一切法非增非減。是謂般若。一切法非染非淨。是謂般若。一切法非有淨法。非有不淨法。是謂般若。一切法非移轉。非趣入。是謂般若。一切法非繫非離繫。非死非生。非生非死。非流轉非有流轉法。非盡非有盡法。非有集法。非有滅法。非有起法。非有盡法。非有變壞法。非無變壞法。非常非無常等。非有貪瞋癡法。非離貪瞋癡法。非作者非使作者等。非斷非常。非有邊非無邊。非見趣非見趣斷。非愛非愛斷。非善非非善。是謂般若。如是般若。非一切法攝。亦非遠離。如是等法。別有般若。如夢。如幻。如燄。如影。如響。如沫。如泡。如芭蕉。如虛空。如影光。如質光。如燈光。非圓成實。於是舍利子。廣歎難見難覺。乃至無邊際等。佛一一印述之。舍利子。問云。何菩薩位。如是法。行諸境界。佛言。尚不得法。何況非法。尚不得道。何況非道。知一切境。皆無境性。於一切境。皆無住著。以無邊法為所行境。如空。如風。無有少相而可得者。又此甚深法要。非但耳聞。即名為果。要不放逸。精進修行。如實了知。遠離眾惡。自他俱利。乃名為果。若於正法起異解行。不名聞法。

若於法義起顛倒解。不正修行。定無順忍。不應深信。微少善根。謂彼即能脫諸惡趣。若得順忍。能不復造惡趣業。不復懈怠。起順退分。時舍利子告善現言。云何具壽默然不說般若。善現答言。我於諸法都無所見。故無所說。乃至甚深般若。不可說示。佛告善勇猛言。菩薩修行般若。於一切法。都無所行。以一切法。皆是顛倒之所等起。非實。非有。邪僞虛妄。若能行無所行。爲行般若。徧知一切所緣而行。除遣一切所緣而行。善勇猛言。菩薩修行甚深般若。不可思議。佛言。如是一切法。皆不可思議。故菩薩修行般若。亦不可思議。善勇猛言。如是行深般若。是無上行。清淨行。明白行。無生行。無滅行。超出行。難伏行。佛印成之。又明一切法。皆以無性爲性。不可修。亦不可遣。菩薩於一切法。無取無執。無住無著。成就功德智慧大威神力。能降伏魔。乃至付囑賢守導師等五百上首菩薩。及善勇猛菩薩。又復微笑。放光。令大千界處處有情。互得相見。天龍鬼神。花香供養。讚詠神力。無數菩薩。得無生忍。無邊有情。發無上心。

八卷。

△放光般若波羅密多經三十卷。 榮重芥

西晉于闐國沙門無羅叉共竺叔蘭譯。

共九十品。與大般若第二分同本。而有常啼法上二品。

○摩訶般若波羅密經三十卷。 黃海鹹

姚秦天竺沙門鳩摩羅什共僧叡譯。

共九十品。亦同放光般若。而文較順暢。

光讚般若波羅密經十卷。河

西晉月支國沙門竺法護譯。

共二十一品。亦同上經。而文來未盡。

道行般若波羅密經十卷。有道安序。淡

後漢月支國沙門支婁迦讖譯。

共三十品。與大般若第四分同。而有常啼曇無竭二菩薩事。

小品般若波羅密經十卷。有僧叡序。鱗

姚秦天竺沙門鳩摩羅什譯。

共二十九品。與道行同。

○佛母出生三法藏般若波羅密多經二十五卷。北作十四卷。南似闍。北履薄。

宋北印土沙門施護譯。

共三十二品。亦同道行。而文暢順。

○佛母寶德藏般若波羅密經三卷。今作二卷。南履。北臨。

宋中印土沙門法賢譯。

即佛母般若三十二品之攝頌也。

大明度無極經六卷。稽

吳月支國優婆塞支謙譯。

共三十品。亦同道行。

摩訶般若波羅密鈔經五卷。潛

符秦天竺沙門曇摩蜚共竺佛念譯。

共十三品。亦同道行。而文來未盡。

◎勝天王般若波羅密經七卷。羽

陳優禪尼國王子月婆首那譯。

與大般若第六分同。

◎文殊師利所說摩訶般若波羅密經一卷。翔

蕭梁扶南國沙門曼陀羅仙譯。

與大般若第七會同。又收入寶積第四十六會。

◎文殊師利所說般若波羅密經一卷。翔

蕭梁扶南國沙門僧伽婆羅譯。

亦與大般若第七會同。

佛說濡首菩薩無上清淨分衛經二卷。一名決了諸法如幻三昧。翔

劉宋沙門釋翔公譯。

與大般若第八會同。

◎金剛般若波羅密經一卷。羽

姚秦天竺沙門鳩摩羅什譯。

與大般若第九會同。而舉世流通。智者大師有疏。

◎金剛般若波羅密經一卷。羽

元魏北天竺沙門菩提留支譯。

亦同第九會。而分作十二分。

◎金剛般若波羅密經一卷。有跋。羽

陳優禪尼國沙門真諦譯。

金剛能斷般若波羅密經一卷。翔

隋南天竺沙門達摩笈多譯。

文拙甚。

◎能斷金剛般若波羅密經一卷。翔

唐大薦福寺沙門釋義淨譯。

已上並是原本異譯。

◎能斷金剛般若波羅密多經一卷。翔

唐玉華寺沙門釋玄奘譯。即第九會抄出別行。

仁王護國般若波羅密多經二卷。有代宗序。南流北溫。

唐北天竺沙門大廣智不空譯。

序品第一。佛在鷲峰。初年月八日。入大寂靜妙三摩地。放毛孔光。普照十方。菩薩來集。觀如來品第二。說護佛果護十地行。波斯匿王言。觀身實相。觀佛亦然。佛印之。菩薩行品第三。二諦品第四。護國品第五。不思議品第六。奉持品第七。有金剛手菩薩所說呪。囑累品第八。文更順暢。最宜流通。

△仁王護國般若波羅密經二卷。翔

姚秦天竺沙門鳩摩羅什譯。

與上經同。有智者大師疏。

佛說了義般若波羅密多經二紙餘。南淵北斯。

宋北印土沙門施護譯。

佛告舍利子。般若波羅密相應行者。當於諸法如實了知。諸有所作。離一切相。即能圓滿六度。又當斷除十種疑惑。

佛說五十頌聖般若波羅密經二紙欠。南履北臨。

宋北印土沙門施護譯。

佛在鷲峰。告須菩提。般若波羅密經。於三乘法。聚集攝受。平等如一。

佛說帝釋般若波羅密多心經三紙餘。南版北臨。

宋北印土沙門施護譯。

佛在鷲峰。爲帝釋說般若義無邊。及說頌說呪。

般若波羅密多心經十六行半。翔

唐大慈恩寺沙門釋玄奘譯。

舉世流通。文約義富。

摩訶般若波羅密大明呪經一紙欠。翔

姚秦天竺沙門鳩摩羅什譯。

◎佛說聖佛母般若波羅密多經一紙半。南清北薄。

宋北印土沙門施護譯。

二經俱與上同本。而後譯有序及流通。佛在鷲峰入定。舍利子問觀世音。觀世音說竟。佛出定讚之。

卷第二十四

大乘經藏 法華部第四

述曰。凡是開權顯實。授聲聞成佛記。發迹顯本。明成佛甚久遠。及但明一乘修證之法。無二無三者。皆此部收。

無量義經一卷。前有劉虬序。草。

蕭齊中天竺沙門曇摩伽陀耶舍譯。

德行品第一。大莊嚴菩薩讚佛。說法品第二。大莊嚴問。何法速成菩提。佛答。有一法門。能令速成菩提。謂無量義。從一法生。一法者。名爲眞相。十功德品第三。

此說法華之前茅也。故收入法華部中。

妙法蓮華經七卷。草。

姚秦天竺沙門鳩摩羅什譯。

序品第一。佛在耆闍崛山。先說無量義經。次入無量義定。眉光東照。萬八千土。彌勒疑問。文殊述往事。以釋之。方便品第二。世尊出定。告舍利弗。諸佛方便。不可思議。唯佛與佛。乃能知之。即止不說。舍利弗三請。五千增上慢者退席。乃唱唯一大事。所謂開示悟入佛之知見。一切皆當作佛。實無三乘。譬喻品第三。授舍利弗記。說火宅喻。信解品第四。須菩提。迦旃延。大迦葉。目犍連。領解佛旨。說窮子喻。藥草喻品第五。佛問四人所說。而推廣之。授記品第六。授大迦葉等四人記。化城喻品第七。先說大通智勝佛時。十六王子。覆講結緣事。次說化城喻。五百弟子授記品第八。富樓那爲上首。五百弟子皆得受記。說繫珠喻。授學無學人記品第九。阿難羅睺羅。爲上首。法師品第十。佛因藥王善。

薩。告八萬大士。持此經。速得佛。并說鑿井喻。見寶塔品第十一。多寶佛塔從地涌出。大聲讚善。釋迦如來以神力。三變淨土。分身諸佛咸集。與欲開塔。多寶如來。分半座與釋迦同坐。釋迦大聲唱告勸持。提婆達多品第十二。說如來往昔求法事。阿私仙得聞妙法。今授提婆達多大善提記。文殊入海弘經。龍女獻珠成佛。持品第十三。藥王大樂說等。各各發願持經。佛授大愛道及耶輸記。又視八十萬億那由他諸菩薩。諸菩薩亦發願持經。安樂行品第十四。文殊請問末世持經方法。佛以身口意誓願。四安樂行答之。兼說輪王髻珠喻。從地涌出品第十五。六萬恆沙菩薩。各將眷屬。從地涌出。大眾懷疑。彌勒興問。如來壽量品第十六。佛自明成道已來甚久。以釋衆疑。說醫王喻。分別功德品第十七。明在會聞法獲益之多。及明五品弟子功德。隨喜功德品第十八。法師功德品第十九。明法師得六根清淨。常不輕菩薩品第二十。明往古比丘。以隨喜行得淨六根。速成佛道。如來神力品第二十一。出廣長舌。放毛孔光。警歎彈指。聲徧十方。囑累品第二十二。三摩衆菩薩頂而囑付之。藥王菩薩本事品第二十三。宿王華菩薩請問。佛爲說一切衆生喜見菩薩。然身然臂事。妙音菩薩品第二十四。佛放眉間光照東方世界。召此菩薩來作佛事。觀世音菩薩普門品第二十五。無盡意菩薩請問。佛爲說十四無畏。三十二應。種種功德。陀羅尼品第二十六。菩薩及天神等各各說呪護法。妙莊嚴王本事品第二十七。明往古淨德夫人。淨藏淨眼二子。同化父王見佛。普賢菩薩勸發品第二十八。佛爲普賢重示四法。普賢說呪護持。

此一部經。乃如來究竟極談。具明施設一代時教。所以然之線索。如家業之有總帳簿。如天子之有

九鼎也。非精研智者大師玄義文句。不盡此經之奧。仍須以荆谿尊者釋籤妙樂輔之。

正法華經十卷。木

西晉月支國沙門竺法護譯。

與上經同。但藥草品中有迦葉問答。及生盲喻。五百弟子授記品初。有入海取寶喻。法師品名爲藥王如來品。有寶蓋王及千子與善蓋太子法供養事。一切呪皆翻梵成華。囑累品在最後。

妙法蓮華經八卷。前有序。南蓋北賴。

隋北天竺沙門闍那崛多共達摩笈多譯。

多用什師譯文。但添藥草品後生盲一喻耳。陀羅尼品在第二十一。囑累品在最後。提婆達

多品。合入見寶塔品。故止有二十七品。

薩曇芬陀利經半卷。草

附西晉錄。

即寶塔品提婆達多品別出。

◎觀世音菩薩普門品一卷。南「缺」北草。

鳩摩羅什譯文。闍那笈多譯頌。

按藏中法華經普門品無重頌。今既補入全經。則此品便爲重出。然舉世流通。功驗最多。智者大師有別行玄疏。四明尊者復有記解。最精最妙。不可不閱。

法華三昧經牛卷 草

劉宋枳園寺沙門釋智嚴譯。

衆會欲問佛。佛放口光徧十方。即不見佛身相。大衆各入三昧。觀察不可得。羅閱王辯通。及女利行等。來佛從地涌。坐蓮華上。利行問佛。乃至得道。與衆問答。諸女發心。皆出家。王亦出家。得授記。廣博嚴淨不退轉法輪經四卷 髮

劉宋枳園寺沙門釋智嚴共寶雲譯。

文殊師利以神通力。同舍利弗到十方世界。供佛。集一切菩薩。同到祇園。請轉不退法輪。說堅信堅法。八人四果。聲聞支佛。密義。令諸衆會。捨離諸想。其諸羅漢。復作成就五逆。滿足五欲。遠離正見等密語。衆會驚疑。文殊釋之。佛現舌相。普授聞經不退轉記。波旬入會。佛復以密語遣之。大衆騰疑。佛爲解釋。次有三菩薩來。一自稱是如來。一自稱是世尊。一自稱是佛。衆又騰疑。佛爲解釋。於是衆菩薩各以偈讚。阿難請問較量功德。師子童女。及比丘尼。居士婦。發心受持。捨離女身。乃至明不信罪報。大衆悔過。請佛守護流通。

不退轉法輪經四卷 髮

安公涼土譯經在北涼錄。

阿惟越致遮經四卷 南此北蓋。

西晉月支國沙門竺法護譯。

二經並與上同。

大薩遮尼毘子授記經十卷。豈

元魏北天竺沙門菩提留支譯。

序品第一。佛住鬱闍延城嚴熾王園。於大衆中。現殊勝身相。問疑品第二。文殊偈讚請問。佛止之。文殊復問。一乘品第三。明二種十二法。能發菩提。又布施乃至方便。各十二種妙行。又如來有十二勝妙功德。淨佛國土。爲利衆生。示十二濁。實唯一乘。分別說三。詣嚴熾王品第四。大薩遮詣王所也。王論品第五。薩遮爲嚴熾說聖王法。及小王法。請食品第六。王請薩遮。問罪過品第七。王問智人。亦有罪否。薩遮次第舉諸人過。并王過。及自過。如來無過功德品第八。薩遮爲王備演如來所有功德。所謂三十二相。八十種好。大慈大悲。三念處。三不護。一切種智。十自在。三十七品。十力。四無所畏。十八不共法。及常無盡法身。詣如來品第九。薩遮與王同來見佛。說法品第十。舍利弗與薩遮論見佛聞法事。佛爲薩遮發迹。授記品第十一。授薩遮大菩提記。信功德品第十一。

此經文義俱暢。宣說世出世法。曲盡其妙。急宜流通。

△菩薩行方便境界神通變化經三卷。養

劉宋中天竺沙門求那跋陀羅譯。

與上經同。缺王論品。而於如來功德。亦有缺略。

金剛三昧經二卷。南賢北難。

出北涼錄。

序品第一。佛於靈山。先說大乘一味真實法。即入金剛三昧。阿伽陀比丘說偈讚歎。無相法品第二。佛從三昧起。更宣一味法。解脫菩薩。更請爲末世衆生。宣說入一味法。無生行品第三。心王菩薩問得無生忍義。本覺利品第四。無住菩薩問轉入唵摩羅義。入實際品第五。大力菩薩問答。眞性空品第六。舍利弗問答。如來藏品第七。梵行長者問答。總持品第八。地藏菩薩問答。并囑阿難受持。

大法鼓經二卷 染

劉宋中天竺沙門求那跋陀羅譯。

佛在祇洹海衆雲集。說有非有法門。波斯匿王。擊鼓吹貝而來。佛言。我今當說大法鼓經。先命迦葉觀察衆會。堪聞與否。乃有百千萬億阿僧祇分聲聞緣覺。初業菩薩。皆從座去。餘一切住。然後廣讚迦葉。命於此法少問其義。所謂如來常樂我淨。不般涅槃。一切衆生。皆有佛性。無有三乘。實唯一乘。一切空經。是有餘說。惟有此經。是無上說。亦說化城窮子等喻。次囑迦葉。於末世中。護持此法。迦葉辭謝不堪。佛言。迦葉。於我滅後。護持此法。有四十年。若至正法餘八十年時。惟一切世間樂見童子能持。

佛說觀普賢菩薩行法經一卷。一名觀普賢觀經。一名出深功德經。南閩北短。

劉宋罽賓國沙門曇摩蜜多譯。

阿難。迦葉。彌勒。同問如來滅後。修行大乘法要。佛爲說普賢觀門。及懺悔六根罪法。此與法華普賢勸

發品相爲表裏。故智者大師法華懺儀。全宗此經。

卷第二十五

大乘經藏 涅槃部第五

述曰。大涅槃部。別在一日一夜。通該一代。凡是扶律談常。顯佛實不滅度者。皆此部收。又如遺教等經。雖在此時。以小機所見。仍歸阿舍。

大般涅槃經四十卷。南率賓歸王。北賓歸王鳴。

北涼中天竺沙門曇無讖譯。

壽命品第一。佛在拘尸那城力士生地。阿利羅跋提河邊。娑羅雙樹間。二月十五日。臨涅槃時。大聲普告衆生。若有所疑。今悉可問。爲最後問。面門放光。徧照十方。爾時八百千諸比丘。六十億比丘尼。一恆河沙菩薩。二恆河沙優婆塞。三恆河沙優婆夷。四恆河沙諸離車等男女大小。五恆河沙大臣長者。六恆河沙諸王眷屬。七恆河沙諸王夫人。八恆河沙諸天女等。九恆河沙諸龍王等。十恆河沙諸鬼神。十一恆河沙金翅鳥王。十二恆河沙乾闥婆王。十三恆河沙緊那羅王。十四恆河沙摩睺羅伽王。十五恆河沙阿脩羅王。十六恆河沙陀那婆王。十七恆河沙羅刹王。十八恆河沙樹林神王。十九恆河沙持呪王。二十恆河沙貪色鬼魅。百億恆河沙天諸采女。千億恆河沙地諸鬼王。千萬億恆河沙諸天子。十萬

億恆河沙四方風神。十萬億恆河沙主雲雨神。二十恆河沙大香象王。二十恆河沙師子獸王。二十恆河沙諸飛鳥王。二十恆河沙水牛牛羊。二十恆河沙諸神仙人。一切蠶王。一切山神。海神。河神。皆悉集會。樹林變白。猶如白鶴。四天王。三十三天。乃至第六天。大梵天王。阿脩羅王。所設供養。倍勝前。佛皆不受。魔王獻供。并護法呪。佛受其呪。不受其供。大自在天王。設供倍前。東方虛空等佛。遣無邊身菩薩來獻香飯。大地震動。南西北方諸佛世界。亦有無量無邊身菩薩。所持供養。倍勝於前。乃至毒蛇。及惡業者。一切來集。唯除摩訶迦葉阿難二衆。阿閼世王及其眷屬。佛面所出光明。耀覆大衆。所應作已。還從口入。純陀與同類十五人俱。願設最後供養。佛即許之。爲說二施果報無別。一者受已得菩提。二者受已入涅槃。純陀因大衆勸。說偈請佛住世。佛以偈答。純陀次答文殊。不應以如來法同於諸行。乃至既去辦供。地大震動。衆會哀請。佛慰諭之。令問所疑。并示祕密之藏。猶如「字」略斥無常苦無我三修。無有實義。爲說勝三修法。又我所有無上正法。悉以付囑摩訶迦葉。當爲汝等作大依止。并說明醫禁乳用乳之喻。次勸問戒律所疑。比丘再辭不堪。於是迦葉菩薩承佛神力。說偈問法。佛讚之曰。我初成道。有諸菩薩曾問是義。如是問者。則能利益無量衆生。次爲說菩提因業。得壽命長。佛視衆生。同於子想。愛念成就。諸毀禁者。囑令苦治。無有惡心。如來長壽。最爲第一。如彼醍醐。賊不能得。法性無滅。三歸無異。金剛身品第二。佛爲迦葉菩薩說如來身常住不壞。由於往昔護法因緣。今得成就。就是金剛身。名字功德品第三。釋大般涅槃名義。如來性品第四。分別開示四義。一自正。二正他。三能隨問答。四善解因緣義。迦葉菩薩言。世尊唯有密語。無有密藏。咸令衆生悉得知見。佛讚印之。次說百句解脫

之義。次說四人爲世間依。次明魔說佛說經律種種差別之相。次明知常住者。知四聖諦。次明四顛倒相。次說貧女金藏喻。塗乳洗乳喻。力士額珠喻。雪山樂味藥喻。次明方等經者。尤如甘露。亦如毒藥。消則爲藥。不消爲毒。次明大乘無有三歸分別之相。次明無二之性。即是實性。次說金鑑抉膜。示二三指之喻。又廣說十住菩薩見性少分之喻。又說夢語刀刀之喻。次明十四音名曰字本。應離半字。善解滿字。次明二鳥雙遊之喻。次說月無出沒半滿之喻。日出三時長短之喻。次廣說喻明大涅槃經利益一切。唯不能益一闍提人。次說先陀婆一名四實之喻。以喻如來密語難解。次明自知有佛性者。名丈夫相。次爲文殊釋本無今有偈義。一切大衆所問品第五。佛面放光照純陀身。受其供養。又化佛及僧。受諸大衆供養。說偈慰喻。次廣明一切契經有餘無餘之義。爲欲調伏諸衆生故。現身有疾。右脅而臥。如彼病人。現病品第六。迦葉菩薩勸佛起坐。放光徧照。利益一切。廣爲迦葉說祕密教。及說五人有病行處。所謂四果辟支。非如來也。聖行品第七。爲迦葉菩薩說五種行。一聖行。二梵行。三天行。四嬰兒行。五病行。復有一行。是如來行。所謂大乘大涅槃經。次即廣明聖行。護戒如護浮囊。得四念處。住堪忍地。觀四聖諦。乃至住無畏地。得二十五三昧。壞二十五有。次答住無垢藏王菩薩說從牛出乳喻。并說往昔捨身求半偈事。梵行品第八。爲迦葉菩薩說住七善法。得具梵行。一知法。謂知十二部經。二知義。三知時。四知足。五知自。六知衆。七知尊卑。復有梵行。謂慈悲喜捨。因即廣明如來慈善根力。令諸衆生見種種事。又爲重釋本有今無偈義。又釋一切世間不見覺菩薩。悉能知見覺義。於中廣明六念法門。次敘阿闍世王見佛之事。次結示天行品者。如雜華說。嬰兒行品第九。不能起住來去語言。

是名嬰兒。如來亦爾。光明徧照高貴德王菩薩品第十。佛告德王。修行大涅槃經。得十事功德。一者有五。一。所不聞者而能得聞。二。聞已能爲利益。三。能斷疑惑之心。四。慧心正直無曲。五。能知如來祕藏。二。昔所不得而今得之。昔所不見而今見之。昔所不聞而今聞之。昔所不到而今得到。昔所不知而今知之。三。捨世諦慈。得第一義慈。四。有十事。一。根深難可傾拔。二。於自身生決定想。三。不觀福田及非福田。四。修佛淨。五。滅除有餘。六。斷除業緣。七。修清淨身。八。了知諸緣。九。離諸怨敵。十。斷除二邊。五。有五事。一。諸根完具。二。不生邊地。三。諸天愛念。四。常爲天寃沙門刹利婆羅門等之所恭敬。五。得宿命智。六。得金剛三昧。七。知四法。爲大涅槃近因。一。親近善友。二。專心聽法。三。繫念思惟。四。如法修行。八。除斷五事。五陰。遠離五事。五見。成就六事。六念。修集五事。知定。寂定。身心受快樂定。無樂定。首楞嚴定。守護一事。菩提心。親近四事。大慈。大悲。大喜。大捨。信順一實。一道。大乘。心善解脫。貪患癡心永斷滅。慧善解脫。於一切法。知無障礙。九。初發五事。悉得成就。一信心。二直心。三戒。四親近善友。五多問。十。修集三十七品。入大涅槃常樂我淨。爲諸衆生分別解說大涅槃經。顯示佛性。若四果辟支菩薩。信是語者。悉得入大涅槃。若不信者。輪迴生死。師子吼品第十一。佛告大衆。恣汝所問。吾當解說。師子吼菩薩請問。以何義故名爲佛性。何故復名常樂我淨。若一切衆生有佛性者。何故不見。十住菩薩住何等法。不了了見。佛住何等法。而了了見。佛讚其具二莊嚴。并細答釋於中。具明觀十二緣智。凡有四種。下者得聲聞道。中者得緣覺道。上者住十住地。上上者得無上菩提。是故十二因緣。名爲佛性。即第一義空。名爲中道。即名爲佛。名爲涅槃。又凡有心者。定當得成菩提。故說一切衆生悉有佛性。又不可以有退心。故言

無佛性。若有修集三十二相業因緣者。得名不退菩薩。次明真修戒定慧相。次答拘尸那城入般涅槃之因。次答何等比丘莊嚴雙樹之間。次答涅槃無十相故。名爲無相。色聲香味觸生住壞男女時時修習定慧捨相。能斷十相。次答成就十法。能見涅槃無相。一者信心具足。二者淨戒具足。三者親近善知識。四者樂於寂靜。五者精進。六者念具足。七者輕語。八者護法。九者供給同學。十者具足智慧。次明能修身戒心慧。是名智者。能令重業輕受。不修身戒心慧。名爲愚癡。能令輕業重受。次說恆河七種人喻。衆盲觸象喻。次明菩薩當以苦行自試其心。次明大海有八不可思議。大涅槃經亦復如是。次答如來示同胎生之故。師子吼說偈讚佛。迦葉菩薩品第十二。問善星比丘事。佛爲答之。問未來種種異說事。佛具釋之。又明如是諍訟。是佛境界。非諸二乘所知。若人於是生疑心者。猶能摧壞無量煩惱。若於中生決定者。是名執著。次明斷善根者。非是下劣愚鈍之人。亦非天中及三惡道。次明佛性非有非無。亦有亦無。次明十二部經。或隨自意說。或隨他意說。或隨自己意說。次說恆河七衆生喻。次說佛性常故。非三世攝。虛空無故。非三世攝。次明修無常等十想者。能得涅槃。迦葉菩薩以偈讚佛。憍陳如品第十三。世尊告憍陳如。色是無常。因滅是色。獲得常住解脫之色。受想行識亦爾。苦空無我不淨亦爾。若離佛法。無有沙門及婆羅門。亦無沙門婆羅門法。爾時外道聞已。瞋恚共往阿闍世所。求與瞿曇論議。王與外道同來佛所。先答闍提首那婆羅門問。度令出家證果。次答婆私吒梵志問。亦令證果。即入涅槃。次答先尼梵志問。善來得果。次答迦葉梵志問。出家五日而證四果。次答富那梵志問。善來得果。次答清淨梵志問。出家十五日後。得阿羅漢。次答犢子梵志問。出家十五日後。得於初果。復來問法。

佛爲說奢摩他毗婆舍那。聞已修習得阿羅漢。寄謝於佛。入般涅槃。次答納衣梵志問。善來得果。次答弘廣婆羅門問。並因僑陳如答。發廣大心。佛爲發迹顯本。次明阿難具足八種不可思議。勅文殊師利以呪攝歸。命其往語須跋陀梵志。尋來見佛。問答實相深義。大衆獲益無量。須跋得證四果。

◎南本大般涅槃經三十六卷。南鳴至竹北鳳至白。

北涼中天竺沙門曇無讖譯。

劉宋沙門釋慧觀同謝靈運再治。

序品第一 純陀品第二 哀歎品第三 長壽品第四 從壽命品分出爲四 金剛身品第五
名字功德品第六 四相品第七 四依品第八 邪正品第九 四諦品第十 四倒品第十一
如來性起品第十二 文字品第十三 鳥喻品第十四 月喻品第十五 菩薩品第十六 於
如來性品分出爲十 一切大衆所問品第十七 現病品第十八 聖行品第十九 梵行品第
二十 嬰兒行品第二十一 光明徧照高貴德王品第二十二 師子吼品第二十三 迦葉品
第二十四 僑陳如品第二十五 此部文更精練。章安尊者依此作疏。但世罕流通。而舊本則久
行世間矣。

大般泥洹經六卷 南白北食。

東晉平陽沙門釋法顯共覺賢譯。

共十八品。齊至如來現病而止。聖行以下。皆未有。生公明闡提皆有佛性。而見擯斥。想依此經。

大般涅槃經後分二卷 白

唐南海沙門若那跋陀羅與會寧等譯。

憍陳如品之末。致須跋陀羅焚屍現神變事。遺教品第一。佛囑阿難大衆。護持大涅槃法。阿泥樓豆。令阿難請問四事。佛答以十二因緣正觀。教示車匿尸波羅戒。是汝大師。依四念處。嚴心而住。一切經初。當安如是我聞等語。次答滅後供物。不得餘用。次答深心供養舍利。如芥子許。與現在供佛無異。次答茶毗方法。當依轉輪聖王及答茶毗處所。起塔處所。並示辟支四果輪王塔式。止許帝釋一牙舍利。卻衣顯示金身。放光三告。二十四反。上昇虛空。殷勤勸諭。應盡還源品第二。世尊三返。從超入諸禪定。普爲大衆三返說法。於其中夜。入第四禪。寂然無聲。便般涅槃。八樹變白。十方大暗。尸棄大梵。釋提桓因。樓豆。阿難。各以偈歎。機感茶毗品第三。金棺自舉。遶拘尸城。待迦葉來。棺開身顯。灌洗纏已。棺門即閉。復現雙足。心曾火踊。七日火盡。聖軀廓潤品第四。七國興兵。圍拘尸城。煙婆羅門。唱分八分。各各起塔。

佛說方等般泥洹經二卷 南駒北白。

西晉月支國沙門竺法護譯。

哀泣品第一。阿難述夢。那律偈歎。大衆哀泣。四童子現生品第二。東方善思義菩薩。示生作阿闍世王子。南方喜信淨菩薩。示生作師子長者子。西方空無菩薩。示生作須福長者子。北方神通華菩薩。示生作師子王兵臣子。皆生即跏趺說偈。導一切衆見佛。四童子品第三。佛爲阿難宣唱四童子德。

囑累品第四。四菩薩說偈慰阿難。佛以阿難羅云。囑十萬比丘。又囑北方五百佛。度地獄品第五。佛身放無數光。光中現化佛說法。又放光度三類地獄。一令生忉利證初果。二令生兜率證三果。三令生梵世入泥洹。現諸佛品第六。佛放光照十方同名諸佛。同入泥洹者不可勝數。令此會皆得見。亦聞所說經。佛國淨品第七。現此界清淨莊嚴。不異安樂等刹。天菩薩品第八。諸天來會。阿那律說偈哀歎。十方菩薩同來。興大供養。如來化說法品第九。阿難偈讚佛。佛先入三昧。現無量化佛說法。後復說佛種種三昧勝用。

四童子三昧經三卷。南駒北白。

隋北天竺沙門闍那崛多譯。

與上經同。但至第六品而止。

大悲經五卷。駒

高齊烏菴國沙門那連提黎耶舍共法智譯。

梵天品第一。佛命阿難敷牀。右脅而臥。光掩大千。致大梵王問法。生信。佛以大千界囑付之。商主品第二。魔子商主請佛住世。佛為授辟支記。帝釋品第三。佛教帝釋加被之法。並化脩羅。使離鬪諍。羅睺羅品第四。羅睺不忍見佛涅槃。往至東北方難勝佛處。佛慰諭之。復往上方商主佛處。佛更慰諭。令還此土。釋迦為說見實諦品。大眾獲三乘益。迦葉品第五。阿難悲泣。佛以迦葉能弘傳法。化事慰之。持正法品第六。明佛滅後。有多弘法人。一毗提奢比丘。二提知迦比丘。三優波鞠多。四阿輸婆鞠

多。五鬱多羅。六設陀沙茶上座。七毗頭羅。及刪闍耶二人。八大精進。九末田提。十迦葉。十一闍知迦長者。十二法僧優婆塞。十三祁婆迦比丘。十四大施國王。舍利品第七。極明供養舍利。乃至散一華一念佛之功德。必得涅槃大果。禮拜品第八。摩竭大魚聞商人稱南無佛聲。命終生人道中。出家證四果。何況種深善根。善根品第九。先說寄滴水喻。次明於佛所種善根。決不失減。布施福德品第十。施佛福田。設求不涅槃。亦決當涅槃。因現五華供燃燈佛之妙報。植善根品第十一。明佛從燃燈佛後供養諸佛事。以諸譬喻付囑正法品第十二。佛親執阿難手。囑令流通正法寶藏。問教品第十三。預示結集法。並囑莫放逸。

大乘方廣總持經一卷。南五。北才。

隋北天竺沙門毗尼多流支譯。

佛將涅槃。入如法三昧。令大千界普徧莊嚴。大衆雲集。佛出舌相。徧覆大千。勅彌勒問法決疑。於是淨居天等。請佛說大乘方廣總持法門。佛告彌勒。一切法皆是佛說。不應橫生分別去取。執小廢大。執大廢小。若謗法者。罪則無量。因說彌陀及自往因。致有佛國淨穢之別。又菩薩必具行六度。不可但言宜修般若。又菩薩不得謗他菩薩。其罪極重。

佛說濟諸方等學經一卷。南五。北才。

西首月支國沙門竺法護譯。

與前經同。

集一切福德三昧經三卷。南大北化。

姚秦天竺三藏鳩摩羅什譯。

佛三月後當入涅槃。千世界主那羅延菩薩請問護菩薩法。佛爲說三昧名。時有淨威力士懷慢而來。佛以父母生力示之。發菩提心。那羅延重請三昧之義。佛以發無上心答之。次明修此三昧。應成布施持戒。多聞三種莊嚴。次明成就種種四法。能證無生。次爲力士授菩提記。及諸大菩薩各說菩薩所行法門。此一切菩薩所宜急急受持。令三寶種永不斷絕。

等集衆德三昧經三卷。南四北化。

西晉月支國沙門竺法護譯。

與上經同。

摩訶摩耶經二卷。一名佛昇忉利天爲母說法經。南忘北彼。

蕭齊沙門釋曇景譯。

佛於忉利天放光現化。並勅文殊請母相見。令證初果。爲說神呪。後從天下漸次化度。受魔王請。乃入涅槃。摩耶來赴棺所。佛復開棺。現千化佛。母子相見。以彰孝道。

大方等大雲經四卷。南毀北男。

北涼中天竺沙門曇無讖譯。

大雲初分大衆。健度第一。一切大衆從禪定起。俱集靈山。大雲密藏菩薩雲興諸問。如來讚許。當說常

樂我淨之法。所謂大雲經總持大海。三昧大海。如來法師諸佛法城。法界甚深。常住不變。不可思議。常樂我淨。此經中有四百不可思議解脫法門。及無量法門。亦說妙呪。令降甘雨。震動世界。致諸妙供。

三昧禪度第二 陀羅尼禪度第三 密語禪度第四 轉生有藏禪度第五 得轉生死業煩惱禪度第六 智狂入禪度第七 解脫轉福德藏法門禪度第八 解脫有德轉藏禪度第九 轉功德行禪度第十 大雲虛空生禪度第十一 電光轉禪度第十二 電轉禪度第十三 神通禪度第十四 寶泡禪度第十五 金剛智禪度第十六 無盡禪度第十七 正行禪度第十八 師子吼禪度第十九 師子吼神通禪度第二十 善方便禪度第二十一 神通禪度第二十二 金翅鳥禪度第二十三 大捨禪度第二十四 無畏禪度第二十五 入行禪度第二十六 至心禪度第二十七 勇力禪度第二十八 善禪度第二十九 神通禪度第三十 智禪度第三十一 智寶藏禪度第三十二 施禪度第三十三 福田禪度第三十四 正法禪度第三十五。已上即是釋初品中法門。各出其差別名字也。每一禪度。各有一天女天子等供養偈讚。如來涅槃禪度第三十六。健行梵王問法。無盡意天子答之。大雲密藏請說四百三昧義。佛讚許之。先說祈雨神呪。次釋甚深淨水大海三昧等名義。及其勝用。次有善德婆羅門。疑問提婆達及六羣事。大雲密藏答之。善德思求如來舍利供養。一切衆生樂見童子答之。善德開解淨光天女問此二人來處。佛爲說其往因。並爲授記。增長禪度第三十七。南方諸天子來問經名。佛答以三名。一大雲。二大般涅槃。三無想。並授記末法中事。乃至安樂世界無量壽佛。遣無邊光菩薩來此法會。佛即授淨光天女大菩提記。

此經分分皆有「大雲初分四字」。當知經來未盡。

菩薩處胎經 五卷 悲

姚秦涼州沙門竺佛念譯。

天宮品第一。二月八日夜半。佛臥金棺。以神足力。示處母胎宮殿。集十方菩薩。爲文殊說法。遊步品第二。與彌勒及分別身觀菩薩說法。聖諦品第三。爲大衆說十住四禪。佛樹品第四。化現寶樹。說希有法。三世等品第五。答喜見菩薩問。答彌勒菩薩問。想無想品第六。爲彌勒菩薩說。並答迦葉問。有盲人摸象喻。住不住品第七。答無住菩薩問。八種身品第八。說八方佛刹事。並說西方有懈慢世界。執心不牢固者生之。全身舍利品第九。說諸佛舍利住在下方者。常無常品第十。答觀見無常菩薩問。隨喜品第十一。答東方頂王菩薩問。五道尋識品第十二。現無量骨瑱。令彌勒敲。至佛舍利。則不能尋究其識。諸佛行齊無差別品第十三。變一切菩薩。盡作佛身。同音說法度無量衆。次答無盡意菩薩問。明往古諸天發心。即成正覺之事。行定不定品第十四。答常笑菩薩問。令大衆不復願樂在家俗業。入六道衆生品第十五。答自在菩薩問。令衆生知六道苦。轉法輪品第十六。放光感上方東南方菩薩來。次說有盡無盡法。五神通品第十七。答妙勝菩薩問。令諸衆生捨俗五通。得六通慧。識住品第十八。答普光菩薩問。明識與身非有先後。善權品第十九。答舉手菩薩問。明菩薩權變適化。無明品第二十。答智清淨菩薩問。明黑業受黑報。白業受白報。又明補處菩薩生卑賤家。化度父母事。苦行品第二十一。明六年苦行無益。思惟正道。乃得佛。四道和合品第二十

二。答徧光菩薩問。明不二入。意品第二十三。答根蓮華菩薩問。明意在去來今去來今無意。定意品第二十四。答持空菩薩問。明真實四不思議。光影品第二十五。佛現光影。令諸會者皆同一色。次答賢光菩薩問。明佛光神德。破邪見品第二十六。說光明佛時授記事。文殊身變化品第二十七。顯發文殊過去舍利。現在他方作佛。八賢聖齋品第二十八。答智積菩薩問。明過去化生龍受八戒齋。化金翅鳥王。亦受八戒。五樂品第二十九。明往古帝釋憶佛功德。降阿脩羅。緊陀羅品第三十。信解脫菩薩過去本事。香音神品第三十一。世尊過去本生事。地神品第三十二。答善業菩薩問。明六大以識爲王。人品第三十三。答法印菩薩問。明人種法。行品第三十四。答造行菩薩問。明如來不免九惱。法住品第三十五。囑彌勒菩薩傳布此經。復本形品第三十六。世尊還在金棺寂然無動。迦葉趨到。說偈哀歎。起塔品第三十七。分舍利。各起塔供養。出經品第三十八。大迦葉與優波離。阿難。五百羅漢。并集他方羅漢。八億四千衆。同結法藏。一胎化藏。二中陰藏。三方等藏。四戒律藏。五十住菩薩藏。六雜藏。七金剛藏。八佛藏。

中陰經二卷 南絲北景

姚秦涼州沙門竺佛念譯。

如來五弘誓入中陰教化品第一。佛示涅槃。碎身舍利入火。燄三昧。離舍利七切。坐寶蓮華。令大眾見。放光普照。集一切中陰。與彌勒論中陰法。次捨釋迦牟尼名。轉名妙覺如來。放舌相光。集十方菩薩而爲說法。妙覺如來將諸菩薩入中陰教化品第二。妙覺如來入中陰分身品第三。賢護菩薩問

事品第四 道樹品第五 神足品第六 破愛網品第七 三世平等品第八 無生滅品第九
空無形教品第十 如來捨中陰身入虛空藏三昧。但以聲教不覩其形。有色無色品第十一 歡喜
品第十二 佛見所度已畢。將遊他方。歡喜說偈。

佛說蓮華面經 上下全卷。南詩北景。

隋烏菟國沙門那連提黎耶舍譯。

佛將入涅槃。勅阿難誦觀金身。爲說舍利弗所作佛事。又爲現將來壞法惡事。令生厭離。次至菩提樹
下。諸天哀歎。佛爲懸記蓮華面破鉢鉢。及破鉢所作佛事。

